

LUKUMU L'OLOLO LAKAFUNDI

JOANI

Diui Diakiko l'Etatelu

1 Diui diakil'etatelu; Diui diaki kame la Unyashungu; Diui diaki Unyashungu. 2 Dio diaki kame la Unyashungu l'etatelu. 3 Ndi kakatungi diango tshe; nduku engo kakatungama, kakindi kuntunga. 4 Le ndi kaki lumu; lumu lako mbakayala yanyi y'antu. 5 Yanyi yatohetaka lu udjima, ku udjima kundjitsutshsha.

Joani Ubatizanyi, Omenyi a Jesu

6 Untu omotshi akayi, lakatumama uma le Unyashungu, lukumbu landi Joani. 7 Ndi akayi uku omenyi, dia ndjumanya antu yanyi fundu, dia vo tshe wetawo diui diandi. 8 Ndi taki yanyi, keli ndi akayi dia ndjumanya antu yanyi fundu.

9 Yanyi ya mete yakiko, yatohetelaka unto tshe laya l'andja. 10 Ndi aki l'andja; andja wakatungama uma le ndi, keli wa l'andja kumbéya. 11 Ndi akayi le asikandi, keli asikandi kumbulgula. 12 Ku ndi akasha wane wakulgula, ndu watetawoka lukumbu landi wulu wa vo ndjala ana wa Unyashungu; 13 wane waki kumbuto uma lu dikila kana uma lu lulanglu la dimba, kuyanga uma lu lulanglu l'untu, keli uma lu lulanglu la Unyashungu.

Diui Diakahilo Untu

14 Diui diakahilo untu, diakayala l'atei asu, diakaluli la ngandji ka mamba la mete. Shu takenyi lutumbu landi; lo laki uku lutumbu l'Ona etoi lutwi uma le Shi. (15 Joani akayala omenyi lu dikambu diandi; akahangohango ati: Nd'ako kakamati nti: One layayi l'okongo ami, keli la ntundu, ne dia ndi aki la ntundu kami.) 16 Ku uma lu elulelu kandi, mbakatalungula ngandji ka mamba ladiku dia ngandji ka mamba, shu tshe. 17 Ne dia elembe wakakimwama uma le Mose, ku ngandji ka mamba la mete wakayi uma le Jesu Kristu. 18 Nduku untu lakenyi Unyashungu; tshikima Ona etoi, leli lu tulu ka Shi, kambuwewayanya.

Diui Dia Joani Ubatizanyi le Antu (Mat. 3:1-12; Mak. 1:7-8; Luk. 3:15-17)

19 Diui dia Joani ne. Lam'akatumi asi Juda elombedi a waki la asi Lewi le ndi uma la Jerusalema, dia ntuwumbula vati: We na? 20 Ku ndi aketawo, kumanguna; aketawo ati: Dimi kema Kristu. 21 Vo wakawumbula vati: Ya we na? Elidja keye? Ndi akati ati: Dimi laha ndi. Umvutshi mbeye? Ndi akákaluya diui ati: Kema. 22 Ku vo wakawumbula vati: Akona eye na? dia shu nkalya diui le wane wakatutumi. Kayataye na? 23 Ndi akati ati: Dimi leko diui dia untu lahangoango l'usu ati: Nyusimbili mbuka ka Khumadiiondo! uku akati umvutshi Isaya.

24 Wane wakatumama uma l'atei w'Afarise, 25 wakawumbula vati: Naka we oso aha Kristu, aha Elidja, aha umvutshi, ku ya ukundi atuyubatizaka. 26 Joani akakaluya diui ati: Dimi latubatizaka l'ashi. L'atei anyu kemadi one lahanyeyi. 27 Ndi kayayi l'okongo ami. Dimi kema ololo wukukimi nkelekula okodi a lusabata landi. 28 Akambu aso wakatshama la Betaniya la wedi wa Jorodana, lene akabatizaka Joani.

29 La wedi a pindju, Joani akenyi Jesu ayayi le ndi, akati ati: Nyendi On'a Okoko a Unyashungu, latunyaka kolo ya wa la kete! 30 Ndi kakamataka nti: One layayi l'okongo ami, keli la ntundu kami, ne dia ndi aki la ntundu kami. 31 Dimi kumbéya, keli ne dia mbéyanaya le Isariyele, dikambu so mbakamayi, mbabatizami l'ashi. 32 Joani akati ati: Dimi lakenyi Nyuma ayahulo uma l'ulungu uku fudu ka inga, ku to kakawahema. 33 Dimi kumbéya. Keli lakantumi dia ndjubatiza l'ashi, kakamvutle ati: Untu tshe layuyena Nyuma ayahulo le ndi, la ambutshikala le ndi, ndi katubatizaka la Nyuma k'Ekila. 34 Dimi lakenyi dikambu so, ku lakasanya antu nti: On'a Unyashungu one.

Ambeki wa Joani Ubatizanyi Amotshi Wambuya le Jesu

35 Ntu, la wedi a pindju, Joani akemala

JOANI

ndi la ambeki andi ahendi. 36 Ndi akendi Jesu tee lam'akandatakendakenda, akati ati: Nyendi On'a Okoko a Unyashungu! 37 Ambeki aka ahendi wakawuki ateketa, wakayeli Jesu. 38 Jesu akasikiso, akawaenyi wayuyeli, akawambula ati: Ayanganyu na? Ku vo wakawumbula vati: Rabi (nkadimula ati: Umbetsha), lendi uhangiye na? 39 Ndi akawatela ati: Nyuyi, nyayena. Ku vo wakatshu, wakenyi lene akandahangi. Vo wakahangi la ndi lushi loso, unya aki lasuki l'eshidhi enei wa dikolo. 40 L'atei w'ahendi wakuki Joani ateketa, ndu waküyeli, omotshi aki Andere, onangu Simona Petero. 41 Ndi akatayangi Simona onangu, akawutela ati: Tambena Mesiya (nkadimula ati: Kristu). 42 Ndi akayi la ndi le Jesu. Jesu akawendi, akati ati: *We eli Simona, on'a Joani. Wayuketa Kefasi* (nkadimula ati: Petero).

Filipo la Natanye

43 La wedi a pindju, Jesu akayangi ntsho la Ngalili. Ndi akenyi Filipo, akawutela ati: *Undjeli*. 44 Filipo aki usi Betesayida, usumba wa Andere la Petero. 45 Filipo akenyi Natanye. Ndi akawutela ati: Tambena one lakafundi Mose lu elembe ndu amvutshi, Jesu y'usi Nazareta, on'a Josefus. 46 Ku Natanye akawumbula ati: Engo k'ololo mbeyaka ndja uma la Nazareta uka? Filipo akawutela ati: Yaka yendi. 47 Jesu akenyi Natanye ayayi le ndi, akati dikambu diandi ati: Enda, usi Isariyele mete, laha la lukesi! 48 Natanye akawumbula ati: Uma lendi akayambeysi na? Jesu akükaluya diui ati: La ntundu ka Filipo ataketi, lam'akiye la tshina dia utamba a fingu, dimi lakakenyi. 49 Natanye akükaluya diui ati: Umbetsha, On'a Unyashungu keye! Khum'ekanga ka Isariyele keye! 50 Jesu akükaluya diui ati: We ambetawo, ne dia diui diukutedimi nti: Lakakenyi la tshina di'utamba a fingu? We ayena akambu wuleki ane. 51 Ndi akawutela ati: Mete, mete, kanyutelami nti: Nyayena ulungu ambudihwama, la andjelo wa Unyashungu wambela la wahulo ladiku dia On'a antu.

Tshuki Dia la Kana

2 Lushi la satu, tshuki diakayala la Kana ka la Ngalili. Nyangu Jesu aki laawo. 2 Waketi ndu Jesu la ambeki andi lu tshuki. 3 Lam'akashili wanu, nyangu Jesu akati ati: Vo kema la wanu. 4 Jesu akawutela ati: Umuntu, dikambu diakona diasami la ye? Unya ami atakuki. 5 Nyangu akatela ekambi

ati: Nyutshi kene tshe kayundunyutela. 6 Mbaka shamalu y'ave yaki laawo, yakawakitshaka ne dia mbedia antu, uku aki etshelu k'asi Juda. Mbaka la mbaka kakotoka tediko tuhendi kana tusatu. 7. Jesu akawatela ati: Nyuludia mbaka l'ashi. Vo wakayiludia too ndu l'enyo. 8 Ndi akawatela ati: Nyotekole kakiane; nyotole le olombodi wa dambu. Ku vo wakatole. 9 Lam'akunganela olombodi wa dambu, ashi wakakadimo wanu, wakindi kumbeya lene akiwo (keli ekambi wakatuduwula ashi, wakeyi). Ku olombodi wa dambu aketi utshuki a wadi, akawutela ati: 10 Untu tshe atukimoka wanu w'ololo ntundu. Lam'ayuwono efula, vo wayukimo wane waha ololo efula. Keli we akalamai wanu w'ololo edja ndu kakiane. 11 Dikambu so diakatshi Jesu la Kana ka la Ngalili, mbeli djimbitelu yandi ya ntundu ntunduntundu. Yo yakenya lutumbu landi, ku ambeki andi wakawetawo.

12 L'okongo a dikambu so, Jesu akatshu la Kaperenauma, ndi la nyangu la anangu la ambeki andi. Vo kumpanga leko nshi efula.

*Elongoswelo ka Etemwelo
(Mat. 21:12-13; Mak. 11:15-18;
Luk. 19:45-46)*

13 Elekanelu ka asi Juda kaki lasuki, ku Jesu akatshu la Jerusalema. 14 Ndi akatani wane wakasundjaka ngombe la ekoko la fudu ya binga, ndu amengudi wa falanga wudjashi lu etemwelo. 15 Ndi akatshi uhamba w'eshinga, akawatshanya tshe uma l'etemwelo, ndu ekoko, ndu ngombe. Ndi akatshula falanga y'amengudi, akasukula mesa awo. 16 Ndi akatela waku wakasundjaka fudu ya binga ati: Nyunya diango diku! Tanyuhiluyaki luudu la Papa luudu la atshi w'ukanda. 17 Ambeki wakuho diui diakafundama ati: Saki ka luudu laye kayonde. 18 Ku asi Juda wakawumbula vati: Djimbitelu yakona yeli la ye, ya ntenyaye, ya we ntsha dikambu ne? 19 Jesu akakaluya diui ati: Nyuhandjuli etemwelo kene, ku dimi layukihika lu nshi shatu. 20 Ku asi Juda wakati vati: Wakahiki etemwelo kene deku akumi aenei la samalu, ku we ayukihika lu nshi shatu? 21 Keli ndi akati dia etemwelo ka dimba diandi. 22 Lam'akandulo uma lu nyoi, ambeki andi wakuho diui so diakandati. Vo waketawo afundelu, ndu diui diakati Jesu.

Antu Efula la Jerusalema Wambetawo Jesu

23 Lam'aki Jesu la Jerusalema lu lushi

la wuki l'Elekanelu, antu efula waketawo lukumbu landi lam'akawenyi tulimbitelu takandatshaka. 24 Keli Jesu kumbaekama, ne dia ndi akeyi antu tshe. 25 Ndi kumpumba dia untu mbutela di'akambu w'antu, ne dia ndame akeyi akambu wa l'etema w'antu.

Nikodemo Ambuya Dia Ndjenda Jesu

3 Ufarise omotshi akiko, lukumbu landi Nikodemo. Ndi aki umbuledi omotshi w'asi Juda. 2 Pami kako akayi le Jesu l'utshu, akawutela ati: Umbetsha, shu mbeyaka shati: Umbetsha wuyi uma le Unyashungu mbeye, ne dia nduku leya ntsha tulimbitelu tatshaye tone, tshikima Unyashungu keli la ndi. 3 Jesu akukaluya diui ati: Mete, mete, kakutelami nti: Untu heyi mena diulelu dia Unyashungu, tshikima ndi ambuto ntu. 4 Nikodemo akawumbula ati: Lam'eli untu ekumanyi, ukundi ayundayea mbuto? Ndi ayeya mboto etena ka hendi l'utema a nyangu, ku ndi mbuto ntu? 5 Jesu akukaluya diui ati: Mete, mete, kakutelami nti: Untu heyi mboto lu diulelu dia Unyashungu, tshikima ndi ambuto le ashi la le Nyuma. 6 Luto le dimba, eli dimba; luto le Nyuma, eli Nyuma. 7 Tambaki dia diui diukutedimi nti: Dieli la ye dia mbuto ntu. 8 Loheledi latopepaka lene alangalo. We mbukaka luhelu lalo, keli we heyi lene ayalo la lene atsholo. Untu tshe luto le Nyuma, eko osoku. 9 Nikodemo

akukaluya diui ati: Ukundi ayuyala akambu aso? 10 Jesu akukaluya diui ati: Umbetsha wa Isariyele mbeye, ku we hashihudia akambu aso? 11 Mete, mete, kakutelami nti: Shu mvutaka dieyasu, shu mvutelaka antu dienasu, ku nyu hanyetawo dia nyutelasu. 12 Naka nyu hanyetawo akambu wa la kete wanyutelami, ukundi ayunyetawo akambu wa l'ulungu? 13 Nduku untu lakambela l'ulungu, paka lakahulo uma l'ulungu, On'a untu ndame. 14 Uku akunyia Mose ului l'usui, osoku dieli la On'a untu dia muniyiyama; 15 ne dia untu tshe lawetawo, ayali la lumu la pundju.

"Unyashungu Akalangi wa la Kete Utamanya"

16 Ne dia Unyashungu akalangi wa la kete utamanya, mbakandawasha On'andi etoi lakanduti, dia untu tshe lawetawo, tavokaki, keli ayali la lumu la pundju. 17 Ne dia Unyashungu kuntuma On'andi la kete, dia ndjulumbaya wa la kete, keli dia wa la kete washimbameli le ndi. 18 One lawetawo halumbuyama. One lahetawo

ambulumbuyamaka: ne dia ndi kumbetawo lukumbu la Ona etoi a Unyashungu. 19 Elumbwelu kene ati: Yanyi yakayi la kete, keli antu wakaleki nanga udjima, uleki yanyi, ne dia etsha awo waki kolo. 20 Untu tshe latutshaka kolo, atuhetshaka yanyi. Ndi hatuyakaka lu yanyi, watukutshumuya dia etsha andi. 21 Keli untu tshe latutshaka akambu wa mete, atuyakaka lu yanyi, ne dia etsha andi wenami vati: Wakatshama le Unyashungu.

Jesu la Joani Ubatizanyi Wambubatiza Antu

22 L'okongo w'akambu aso, Jesu la ambeki andi wakayi lu kete ya Judiya. Ndi akatshikala la wo leko abatiza antu. 23 Ndu Joani akabatizaka l'Ayinona, lasuki la Salima, ne dia ashi efula waki leko. Antu wakayi, wakabatizama. 24 Laso ku Joani atadjama lu lukanu.

Joani Ubatizanyi Ambutela Antu Ntu Dia Jesu

25 Ambeki wa Joani wakadjii la usi Juda omotshi tamu lu dikambu dia ndjaedia. 26 Vo wakayi le Joani, wakawutela vati: Umbetsha, ulungi, one laki la ye la wedi a Jorodana, lakayatelaka antu dikambu diandi, atubatizaka, ku antu tshe watuyakaka le ndi. 27 Joani akakaluya diui ati: Untu heyi nungula dikambu, tshikima vo mbuwusha uma l'ulungu. 28 Nyu nyame nyeli emenyi wa aui wakamati nti: Dimi kema Kristu, keli lakatumama la ntundu kandi. 29 Utshuki a wadi keli kanga wadi. Keli ongenyi w'utshuki a wadi lemadi la luka diui diandi, afonganengenaka efula ne dia diui di'utshuki. Okone ongenongeno ami ambulula. 30 Ololo ndi ambeli, dimi nkitikitiki.

Omenyi Uma l'Ulungu

31 One luyi uma l'ulungu, keli ladiku dia tshe. One leli la kete, eko la la kete; ndi atutaka akambu wa la kete. One luyi uma l'ukungu, kuleki tshe. 32 Ndi atutaka akambu wakandeniyi la wakanduki. Nduku untu ambetawo diui diandi. 33 One letawo diui diandi, akadji djimbitelu yandi ati: Unyashungu eko mete. 34 Ne dia one lakatumii Unyashungu, atutaka akambu wa Unyashungu, ne dia ndi kunkimo Nyuma la yediko. 35 Papa atulangaka Ona. Ndi akakimo akambu tshe lu anya andi. 36 One letawo Ona, eko la lumu la pundju. Keli one lahakitanya diui dia Ona, henyi lumu la

pundju, kele ka Unyashungu keko le ndi.

Umuntu Usi Samariya

4 Lam'akenyi Khumadiondjo ati: Afarise wambuka vati: Jesu ndeka Joani mbete antu ambeki la mbabatiza 2 (kuyanga Jesu ndame kumbatizaka antu, keli paka ambeki andi), 3 ndi akamo uma la Judiya, akatshu utsha la Ngalili ntu. 4 Diaki la ndi dia mbeta la Samariya. 5 Ku ndi akakumi l'usumba omotshi wa la Samariya, lukumbu lawo Sukara, lasuki la etenyi ka kete kakasha Jakoba on'andi Josef. 6 Eteko k'ashi ka Jakoba kaki leko. Jesu akakomo la lokendo, ku ndi akadjase l'okenge w'eteko. Aki lasuki la unya l'atei ote.

7 Umuntu usi Samariya akayi dia ndjuduwula ashi. Jesu akawutela ati: Umbisha ashi wa no. 8 Ne dia laso ku ambeki andi wakatshwi l'usumba, dia ntusumba mbu ya nde. 9 Ku umuntu usi Samariya akawumbula ati: We usi Juda, ukundi anombaye ashi, dimi umuntu usi Samariya na? ne dia asi Juda hawosoanaka la asi Samariya. 10 Jesu akûkaluya diui ati: Utuyeya ushasha a Unyashungu, ndu one lakalomba ashi a no, we utôlomba, tshiki ndi utukusha ashi a lumu. 11 Umuntu akawutela ati: Khumadiondjo, we kema la engo ka ndjuwula ashi, ndu eteko keko ohongo, ku uma lendi eye la ashi a lumu? 12 We ndeka tshesu Jakoba lakatusha eteko, kakandanokaka ndame ndu an'andi, ndu dungalunga diandi uka? 13 Jesu akûkaluya diui ati: Untu tshe layono ashi ane, ayuka pusa ntu. 14 Keli untu tshe layono ashi wayumuwusha, huki pusa pundju. Keli ashi wayumuwusha, wayuyala l'utema andi uku eteko k'ashi, kambumbela utsha lu lumu la pundju. 15 Umuntu akawutela ati: Khumadiondjo, umbisha ashi aso, mbahamukaka pusa, ndu mbahumuyakaka etali lindu dia ndjuduwula.

16 Jesu akawutela ati: Utshu, uteli umeye, kuyi lindu. 17 Umuntu akûkaluya diui ati: Dimi kema la umi. Jesu akawutela ati: We ambuta mete, wati: Dimi kema la umi. 18 Ne dia we aki la waumi atanu, one leli laye kakiane, kema umeye. Osoku, mete kataye. 19 Umuntu akawutela ati: Khumadiondjo, dimi lambeaya nti: Umvutshi mbeye. 20 Watshesu wakatemolaka l'ukungu one, ku nyu mvutaka nyati: La Jerusalema keli dihuli diahumba antu ntemola. 21 Jesu akawutela ati: Umuntu, etawo diui diam. Etena kambukuka, kahanyotemola Papa paka l'ukungu one, kuyanga la Jerusalema.

22 Nyu nyatotemolaka kahanyeyi. Shu tatotemolaka keyasu, ne dia panda keko ulu le asi Juda. 23 Keli etena kambukuka, keko kakiane, atemodi wa mete wayotemola Papa lu Nyuma la lu mete, ne dia antu wa wuhu oso mbalanga Papa ndjala atemodi andi. 24 Unyashungu eko Nyuma. Wane watôtemolaka, dieli la wo dia mbôtemola lu Nyuma la lu mete. 25 Umuntu akawutela ati: Dimi mbeiyaka nti: Mesiya lundjayi (letawo vati: Kristu). Lam'ayunduya, ndi ayututela akambu tshe. 26 Jesu akawutela ati: Dimi ako one, latekata la ye.

"Omotshi Atuneka, Ukina Atunaka"

27 Ambeki wa Jesu wakayi l'etenakako. Vo wakambi, ne dia ndi akatketaka la umuntu, keli nduku untu akawumbula ati: Kayangaye na? kana okoko wana waketetaye la ndi? 28 Okone umuntu akatshiki mbaka kandi k'ashi. Ndi akatshu l'usumba, akatutela antu ati: 29 Nyuyi, nyuyendi untu lambumvutela akambu tshe wakamatshaka. Aha Kristu oso? 30 Vo wakunela uma l'usumba, wakayi le ndi.

31 Etena kako, ambeki andi wakôsengasenga vati: Umbetsha, ole. 32 Keli ndi akawatela ati: Dimi leko la mbu ya nde, yahanyeyi. 33 Ku ambeki wakambwana vati: Undi, untu kuwela mbu ya nde? 34 Jesu akawatela ati: Ma diami, dieli ntsha lulanglu la one lakantumi, la dia nshidiya ulimu andi. 35 Nyu hanyututaka nyati: Ambutshikala ngondo nyei, ku dinela ndjala, uka? Nyulungi, dimi lambunyutela nti: Nyedia ashu anyu, nyendi dikambo diambela kasakasa, dia muna. 36 One latunaka, atulungulaka difutu, atusanganyaka wuhu utsha lu lumu la pundju; dia one latuneka la one latunaka ngenangena kame. 37 Ne dia diui ne dieko mete ati: Omotshi atuneka, ukina atunaka. 38 Dimi lakanyutumi, dia ntuna diango diakinyu kunkamba ulimu. Akina wakakambi ulimu, nyu nyamboto l'ulimu awo.

Asi Samariya Efula Wambetawo Jesu

39 Asi Samariya efula wa l'usumba oso waketawo Jesu, ne dia diui dia umuntu diakandati ati: Ndi ambumvutela akambu tshe wakamatshaka. 40 Okone lam'akayi asi Samariya le ndi, vo wakôsengasenga, dia ndi ntshikala la wo. Ku ndi akatshikala leko nshi hyendi. 41 Akina efula waketawo dia diui diandi. 42 Vo wakatela umuntu vati: Shu tambetawo kakiane, aha ne dia aui aye,

keli ne dia shu shame tambuyaukela, ndu tambeya shati: Mete, ndi keli Ushimbedi a wa la kete.

“Umvutshi lu Leke Lawo”

43 L'okongo a nshi hyendi, Jesu akamo uma leko, akatshu la Ngalili. 44 Jesu ndame akati ati: Umvutshi kema la kenemo lu leke lawo. 45 Okone lam'akandayi la Ngalili, asi Ngalili wakülungula, ne dia vo wakenyi akambu tshe wakandatshaka la Jerusalema lu dambu, ne dia ndu vo mbakatshu lu dambu.

Jesu Ambokonoya Untu la Kaperenauma

46 Jesu akayi ntu la Kana ka la Ngalili, lene akandahilula ashi wanu. Olohe omotshi aki leko, aki la ona pami, laki le hemo la Kaperenauma. 47 Lam'akanduki ati: Jesu ambumo uma la Judiya, ambuya la Ngalili, ndi akatshu le ndi. Ndi akösengasenga ati: Uyi, uyukonoya on'ami, ne dia ndi uyanga mvo. 48 Ku Jesu akawutela ati: Utunduyala hanyenyi tulimbitelu la akambu wa mamba, tshiki nyu hanyetawo. 49 Olohe akawutela ati: Khumadiodjo, utayi la ntundu ka on'ami atavu. 50 Jesu akawutela ati: Utshu, on'aye eko la lumu. Pami kako aketawo diui diakawutela Jesu, akatshu. 51 Lam'akandatstatshokaka, ekambi andi wakahumana la ndi, wakawutela vati: On'aye eko la lumu. 52 Ku ndi akawumbula unya wakatatelona nkalangana. Vo wakawutela vati: Lui; lam'aki unya l'ushidi otoi, dimba dja diakükimo. 53 Okone shi akeyi ati: Lu unya ako mete mbakawutela Jesu ati: On'aye eko la lumu. Ndame aketawo, ndu wa lu luudu landi tshe. 54 Djimbitelu sho, mbaki djimbitelu ya hendi yakatshi Jesu lam'akandamo uma la Judiya, lam'akandayi la Ngalili.

Jesu Ambokonoya Untu la Betezata

5 L'okongo w'akambu aso, dambu di'asi Juda diakayala, ku Jesu akatshu la Jerusalema.

2 La Jerusalema, lasuki la eotwelo k'ekoko, kaki ungunda, wakawole l'oteketa w'asi Heberu vati: Betezata. Vo waki la samvu tshanu. 3 Lu samvu sho kaketamaka ului w'akanga wa hemo, tutshungu, tshumbi, ndu dikhusi, wakakungelaka efungushelu k'ashi: 4 ne dia ondjelo wa Khumadiodjo akahuluka tena dimotshi l'ungunda, dia ndjufungusha ashi. Lam'akandafungushaka ashi, ku untu tshe lotwe loko ntundu, mbeyaka nkono uma lu hemo kandi tshe.

5 Pami kemotshi aki leko, laki la hemo deku akumi asatu la enanei. 6 Lam'akawenyei Jesu etami, ndi akeyi ati: Ndi aya la dikambu ne edja. Ndi akawumbula ati: We nangaka nkono? 7 Kanga hemo akükalya diui ati: Khumadiodjo, lam'ayufungusha ondjelo wa Unyashungu ashi, laha la untu lambidja l'ungunda. Keli ndjalaka lakatshu, ku ukina ambundekana. 8 Jesu akawutela ati: Unela, embe tangi kaye, okendekende. 9 Kem'edja, untu ako akakono, akembe tangi kandi, akakendakenda.

Wambosongwela Jesu ne Dia Ndi Akalanya Lushi l'Ekila

Lushi loso, laki lushi l'ekila. 10 Ku asi Juda wakatela one lakakono vati: Elo, eko lushi l'ekila. Memba tangi kaye, eko ekila. 11 Keli ndi akákalya diui ati: Lakakonodi kumvutedi ati: Embe tangi kaye, okendekende. 12 Vo wakawumbula vati: Untu akona akakutedi ati: Embe tangi, okendekende? 13 Keli lakakono, kumbeya one lakókonoya, ne dia ului w'antu waki lu dihuli diako, la Jesu akanganyi. 14 L'okongo diku, Jesu akútani l'etemwelo; akawutela ati: Ulungi, we ambokono. Tutshaki kolo ntu, dikambu diuleki dia ntundu, diatukuya le ye. 15 Untu aco akatshu, akatutela asi Juda ati: Jesu kakankonodi. 16 Dia dikambu so, asi Juda wakahenyahenya Jesu, ne dia ndi akatshi akambu aso lushi l'ekila. 17 Keli Jesu akákalya diui ati: Papa atukambahka edja ndu kakiane, ndu dimi latukambahka. 18 Dia dikambu so, asi Juda wakaleki nyanga mbudiaka, ne dia ndi akalanya lushi l'ekila, ndu aketi Unyashungu ati: Papa, akayaedimia la Unyashungu.

Jesu Ambuyateketela; Ambuhunula Akambu wa Asongwedi Andi

19 Jesu akákalya diui ati: Mete, mete kanyutelami nti: Ona heyi ntsha nduku dikambu ndame, keli ndi atutshaka uku wenandi Shi atsha, ne dia Ona atutshaka akambu tshe watutshaka Shi. 20 Ne dia Shi atulangaka Ona, ku ndi atuwenyaka akambu tshe watshandi ndame. Ndi ayuwenya akambu wuleki ane waki, ne dia nyu mamba. 21 Ne dia Shi atululaka edu, atuwashaka lumu, okone ndu Ona atushaka walangandi lumu. 22 Papa halumbuya untu, keli ndi akasha Ona elumbwelu tshe, 23 ne dia antu tshe walemia Ona, uku alemiawo Shi. One lahalemia Ona, halemia Shi lakütumi. 24 Mete, mete, kanyutelami nti: One luka

JOANI

diui diam, letawo lakantumi, ndi eko la lumu la pundju. Ndi huya l'elumbwelu, keli ndi ambeta uma lu nyoi utsha lu lumu.

25 Mete, mete, kanyutelami nti: Etena kambukuka, keko kakiane, kayuka edu diui dia Ona Unyashungu. Wane wetawo, wayuyala la lumu. 26 Uku eli Shi la lumu l'utema andi ndame, osoku ndi akasha Ona dia ndu ndi ndjala la lumu l'utema andi. 27 Ndi akawusha wulu wa numbuya akambu ne dia ndi eko On'a unto. 28 Tanyambaki dia dikambu so, ne dia etena kambukuka, kayuka wane weli lu waumbu tshe diui diandi, 29 ku vo wayutumba. Wane wakatshaka ololo, wayulo lu eulwelu ka lumu. Ku wane wakatshaka kolo, wayulo l'elumbwelu.

30 Dimi haleyi ntsha nduku dikambu. Dimi latulumbuyaka uku atumukaka. Elumbwelu kami keli ololo, ne dia dimi halangi ntsha uku alangami, keli uku alanga one lakantumi. 31 Naka dime latuyataka, diui diam kema mete. 32 Ukina katumvutaka; dimi mbeyaka nti: Diamvutandi, dieko mete. 33 Nyu nyakatumi antu le Joani, ku Joani akati akambu wa mete. 34 Keli diui dialungulami, kema uma le untu. Dimi lambuta akambu ane, dia nyu nshimbamelia. 35 Joani aki tala, diakalungulaka, diakahetaka. Nyu nyakalangi ngenangena la usasi adio etenyi. 36 Keli diui diam diambuleka diui dia Joani. Ne dia elimu wakambisha Papa dia dimi nshidiya, watumutshaka, vo mbatumvutaka Papa, lakantumi. 37 Papa lakantumi, ambumvuta. Nyu nyatuki diui diandi nduku etena otoi. Nyu nyatenyi utundi andi. 38 Diui diandi hadiuyala la nyu, ne dia nyu hanyetawo one lakandatumi. 39 Nyu nyatuyangiyangiaka lu afundelu, ne dia nyu nyatukanaka nyati: Leko kesu la lumu la pundju; ndu afundelu ntu wambumvuta. 40 Nyu hanyulangi ndja le mi dia nyu ndjala la lumu. 41 Dimi halungula lutumbu uma le antu. 42 Keli dimi nyeyaka nti: Nyu kema la ngandji ka Unyashungu l'etema anyu. 43 Dimi lambuya lu lukumbu la Papa, keli nyu hanyunungula. Keli naka ukina ayuya lu lukumbu landi, nyu nyayulungula. 44 Ukundi weyanyu mbetawo nyu wane watuyatumbulaka, wahatuyangaka lutumbu laya uma le Unyashungu ndame? 45 Tanyukanaki nyati: Dimi layunyosongwela le Papa. One layunyosongwela eko, Mose ndame, lakinshanyu elungamelu kanyu le ndi. 46 Ne dia utunyetawo Mose, tshiki nyu nyakambetawo, ne dia ndi akafundi dikambu diam. 47 Keli naka nyu hanyetawo afundelu andi, ukundi ayunyetawo aui ami?

*Jesu Ambusha Antu Nunu Tanu Mbu ya Nde
(Mat. 14:13-21; Mak. 6:30-44; Luk. 9:10-17)*

6 L'okongo w'akambu aso, Jesu akatshu la wedi w'uduwa a Ngalili, weli uduwa wa Tiberiya. 2 Ului a wuki w'antu wakuyeli, ne dia vo wakenyi tulimbitelu takandatshelaka akanga w'elandu. 3 Jesu akambela lu dikuna, akatudjase la ambeki andi leko. 4 Elekanelu, dambu di'asi Juda, aki lasuki. 5 Ku Jesu akedia ashu, akenyi ului a wuki w'antu wayayi uya le ndi. Ndi akambula Filipo ati: Lendi ayutusumba ma dia antu aku nde? 6 Ndi akawumbula osoku dia mbêdika, ne dia ndame akeyi dikambu diakandalangi ntsha. 7 Filipo akakaluya diui ati: Ma dia denariyo kama hyendi hadiukuki dia untu la untu nungula yema. 8 Umbeki andi omotshi, Andere, onangu Simona Petero, akawutela ati: 9 Dikenda dieko lane la ekama etanu wa epunga, la nsi hyendi. Keli diango ne dieli na l'atei w'antu efula okone? 10 Jesu akati ati: Nyudjasha antu. Aki adiyu efula lu dihuli diako. Okone apami wakadjase, waki uku nunu tanu. 11 Ku Jesu akose ekama. Lam'akanduku lusaka, ndi akekahanya le wane wakadjase, ndu nsi efula uku akawalangi. 12 Lam'akawaluti. ndi akatela ambeki andi ati: Nyotongone betshi diutshikadi, diaha nduku engo nshisho. 13 Ku wakaditonoga, wakaludia asaka dikumi la ahendi too la betshi uma l'ekama etanu wa epunga, wakatshikala uma le wane wakali. 14 Lam'akeyi antu djimbitel sho yakandatshi, vo wakati vati: Mete, umvutshi a wuhu one mbahumba ndja la kete.

15 Lam'akeyi Jesu ati: Vo wuyanga mundami dia mbidjami lu khum'ekanga la wulu, ndi akatshu lu dikuna ntu ndame.

*Jesu Ambokendakenda Ladiku Dia
Uduwa
(Mat. 14:22-27; Mak. 6:45-52)*

16 La dikolo, ambeki a Jesu wakahulo utsha l'uduwa. 17 Vo wakoto lu watu, wakatshokaka utsha la Kaperenauma. Akayala udjima, ku Jesu atakumi le wo. 18 Asukhu wakayala ne dia lopepe la wulu lakapepe. 19 Lam'akawaduki uku kilometere tshanu kana shamalu, vo wakenyi Jesu ayakendakenda ladiku dia uduwa, ayayi uya la watu, ku vo wakuki woma. 20 Keli ndi akawatela ati: Dime, tanyukaki woma. 21 Ku vo wakalangi mbôtshiya lu watu. Kem'edja, watu wakekama lu umamu wa lene akawatshokaka.

Ambutela Antu Dia Ma Dia Lumu

22 La wedi a pindju, antu wakemala la wedi w'uduwa wakenyi vati: Nduku watu ukina weko, paka otoi. Vo wakenyi ntu vati: Jesu komboto la ambeki andi lu watu, keli ambeki andi wakatshu vame. 23 Keli watu ekina uma la Tiberiya wakayi lasuki la dihuli diakawali ma, lam'akuki Khumadiiondo lusaka. 24 Okone lam'akenyi ului w'antu vati: Jesu la ambeki andi kema lindu, vo wakoto lu watu eso, wakayi la Kaperenauma, watayangi Jesu.

25 Lam'akawawenyi la wedi w'uduwa, vo wakawumbula vati: Umbetsha, unya laandi akayayi lindu? 26 Jesu akâkaluya diui ati: Mete, mete, kanyutelami nti: Nyu hanyunyangi ne dia tulimbitelu takanyenyi, keli ne dia nyu nyakali ma, nyakaluti, mbanyanganyu. 27 Tanyukambelaki ma diatulanaka ulimu, keli nyukambeli ma diayutshikala edja ndu lu lumu la pundju, diayunyusha On'a untu, ne dia Papa, Unyashungu ndame, akûkitsha djimbitelu. 28 Ku vo wakawumbula vati: Katshasu na dia ntsha ulimu a Unyashungu? 29 Jesu akâkaluya diui ati: Ulimu a Unyashungu eko okone: nyetawo one lakandatumi. 30 Ku vo wakawumbula vati: Na djimbitelu yatshaye, tendi, keli tuketawo? Ulimu akona watshaye? 31 Watshesu wakalekaka mana l'usui, uku ambufundama ati: Ndi akawasha ma dia nde uma l'ulungu. 32 Ku Jesu akawatela ati: Mete, mete, kanyutelami nti: Aha Mose kakanyusha ma uma l'ulungu, keli Papa katunyushaka ma dia nde uma l'ulungu. 33 Ne dia ma dia Unyashungu diatuyakaka uma l'ulungu, diatushaka wa la kete lumu. 34 Ku vo wakawutela vati: Khumadiiondo, kutushaki ma diako la lushi la lushi.

35 Jesu akawatela ati: Ma dia lumu mbemi. One laya le mi, huka ndjala, lambetawo, huka pusa pundju. 36 Keli dimi lakanyutela nti: Nyakamenyi, keli hanyumbetawo. 37 Tshe wakambisha Papa, wayuya le mi. Dimi halatshanya one laya le mi. 38 Ne dia dimi lakayi uma l'ulungu, aha dia ndjutsha lulangu lami, keli lulangu la one lakantumi. 39 Lulangu la one lakantumi eli diaha dimi nshisha nduku otoi a wane wakandambisha, keli dia mbaulula lushi l'ekumelu. 40 Lulangu la Papa lone, dia untu tshe lenda Ona, lawetawo, ayali la lumu la pundju. Ku dimi layuwulula lushi l'ekumelu.

*Asi Juda Wambungunanguna,
Wambudjana Tamu*

41 Asi Juda wakangunangunela Jesu ne dia ndi akati ati: Dimi leko ma diakayi uma l'ulungu. 42 Vo wakati vati: One aha Jesu, on'a Josefu, leyasu shi la nyangu uka? Ya ukundi atandi ati: Uma l'ulungu kuyemi? 43 Jesu akâkaluya diui ati: Tanyungunangunaki l'atei anyu. 44 Nduku unto leya ndja le mi, tshikima Papa lakantumi kükutudi. Ku dimi layuwulula lushi l'ekumelu. 45 Ambufundama lu afundelu w'amvutshi ati: Tshe wayetshama una le Unyashungu. Untu tshe latukaka ndu lateyaka aui uma le Papa, ndi atuyakaka le mi. 46 Keli nduku unto lakenyi Papa, tshikima one luyi uma le Unyashungu, ndi kakenyi Papa. 47 Mete, mete, kanyutelami nti: One letawo, eko la lumu la pundju. 48 Ma dia lumu mbemi. 49 Watshenyu wakalekaka mana l'usui, ku wakavu. 50 One eko ma diamburga uma l'ulungu, dia untu ladile, tavokaki. 51 Dimi leko ma dia lumu, diakayi uma l'ulungu. Naka untu ayole ma ne, ndi ayulumba pundju. Ee, ma diayumukimo ne dia lumu la wa la kete, mbeli dimba diam. 52 Ku asi Juda wakadjana tamu l'atei awo vati: Ukundi weya untu one ntusha dimba diandi dia shu dile? 53 Jesu akawatela ati: Mete, mete, kanyutelami nti: Nyu hanyuyala la lumu la pundju l'etema anyu, naka hanyuli dimba dia On'a untu, ndu hanyonwe dikila diandi. 54 One lale dimba diam, ndu lano dikila diam, ndjalaka la lumu la pundju. Dimi layuwulula lushi l'ekumelu, 55 ne dia dimba diam dieko engo ka nde ka mete, dikila diam dieko enono ka mete. 56 One lale dimba diam, lano dikila diam, ndi eko l'utema ami, la dimi leko l'utema andi. 57 Uku akantumi Papa leli la lumu, mbemi la lumu uma le Papa. Okone one layonde, ndu ndi ayulyala la lumu uma le mi. 58 One eko ma diakayi uma l'ulungu, aha wuhu wakali watshenyu, ku vo wakavu. One lale ma ne, ayulumba pundju. 59 Akambu aso mbakandati l'etemwelo lam'akandetshaka antu la Kaperenauma.

*Ambeki Efula Wamboseka Jesu;
Petero Ati: "Le Na Atshosu?"*

60 Ambeki wa Jesu efula, lam'akawuki diui so, wakati vati: Diui so wulu. Eya dietawo no? 61 Keli Jesu akeyi l'utema andi ati: Ambeki andi wambungunanguna dia diui so. Ndi akawambula ati: Undi, dikambu so diamburgutakanya? 62 Ukundi ayunyutsha

lam'ayunyena On'a untu atambela utsha lene akindi na? 63 Nyuma katushanya lumu; dimba hatshi dikambu. Aui wakamanyutedi mbeli Nyuma la lumu. 64 Keli nyu amotshi hanyetawo; ne dia Jesu akeyaka uma l'etatelu waku waki kumbetawo, ndu one layüfunga. 65 Ndi akati ati: Dia dikambu ne mbanyutelami nti: Untu heyi ndja le mi, tshikima Papa kuwusha wulu uku.

66 L'okongo a dikambu so, ambeki wa Jesu efula wakakalula ekongokongo, kumengola la ndi ntu. 67 Ku Jesu akambula ambeki dikumi la ahendi ati: Ndu nyu mbalanga ntsho? 68 Simona Petero akawumbula ati: Khumadiondjo, le na atshosu? We keli la aui wa lumu la pundju. 69 Shu taketawo; shu mbeyaka shati: We keli l'Ekila la Unyashungu. 70 Jesu akâkaluya diui ati: Dimi kuyosonola dikumi la ahendi, ku omotshi eko uhimbanyi? 71 Ndi akataka dia Judasi, on'a Simona Isakariyote, ne dia ndi kaki la dikambu dia mbûfunga. Ndi aki omotshi a lu dikumi la ahendi.

Ndu Anangu Jesu Wambangunangunela

7 L'okongo w'akamhu aso, Jesu akakindula la Ngalili. Ndi kunanga nkindula la Judiya, ne dia asi Juda wakayangaka dia mbudiaka. 2 Lushi la wuki l'asi Juda, la dambu dia Tutumbutumbu, laki lasuki. 3 Ku anangu wakawutela vati: Umo lindu, utsu la Judiya, dia ndu ambeki aye kawuteny akambu watuyutshaka. 4 Nduku untu latutshaka akambu lu usheshe lam'ayalangandi ndjaenanya lu seke. Naka we ambutsha akambu ane, kuyaenya le wa la kete; 5 ne dia ndu anangu kûmbetawo. 6 Ku Jesu akawatela ati: Etena kami katayala. Keli etena kanyu ndjalaka nshi tshe. 7 Wa la kete haweyi nyuhetsha. Keli vo watumpetshaka, ne dia dimi latuwataka nti: Etsha anyu weko kolo. 8 Nyutshu lu dambu. Dimi halutsho lu dambu diako, ne dia etena kami atakuki. 9 Lam'akandawatela aui aso, ndi akatshikala la Ngalili.

Wambudja Tamu Dia Dikambu Dia Jesu

10 Lam'akatshu anangu lu dambu, Jesu akayutsho l'okongo diku; ndi kuntumba seke, keli aki uku lu usheshe. 11 Ku asi Juda wakûyangi lu dambu. Vo wakambwana vati: Lendi endi na? 12 Elui w antu wakûngunangunela efula. Amotshi wakati vati: Untu ololo kendi; akina vati: Kema, ndi atunganyiyaka antu. 13 Keli nduku untu lakateketa dikambu diandi lu seke, ne dia

woma w'asi Juda.

14 Keli l'atei a nshi ya dambu, Jesu akoto l'etemwelo, aketsha antu. 15 Ku asi Juda wakambi; wakati vati: Ukundi weya untu one mukanda efula, lam'akindi kumbeka? 16 Jesu akâkaluya diui ati: Wetshelu ami aha wami, keli wa one lakantumi. 17 Naka untu ayutsha lulangu la Unyashungu, ndi ayeya wetshelu, kana uma le Unyashungu mbewo, kana dime kayata. 18 One latuyataka, atuyangaka lutumbu landi, keli one layanga lutumbu la one lakûtumi, ndi eko mete; kolo kema l'utema andi. 19 Mose kunyusha elembe uka? Keli nyu tshe, nduku untu latuwetshaka. Okoko wana wayanganyu ndjakami? 20 Ului w'antu wakûkaluya diui vati: We eko la odienge. Akona ayanga nkudiaka? 21 Jesu akâkaluya diui ati: Dimi lakatshi dikambu otoi, ku nyu tshe nyakambi dia dikambu diako. 22 Mose akanyetsha dikambu dia mbahema uehekeli (dio kundja uma le Mose mete, diakayi uma le watshenyu), ku nyu nyatchemiaka untu uehekeli lushi l'ekila. 23 Naka untu atahemaka uehekeli lushi l'ekila, ne dia olembé wa Mose tawuvokaki, ya ukundi ambukanyu kele ne dia dimi lambokonoya untu lushi l'ekila? 24 Tanyaelakai untu uku awenanyu, keli nyuwaleli la sambu k'ololo.

Atunyi wa Jesu Wambamba Dikambu Diandi; Antu k'Antu Efula Wambuwetawo

25 Antu amotshi wa la Jerusalema wakambula vati: Aha ndi layangawo ndjaka one uka? 26 Nyendi, ndi latuhunwelaka antu diui, ku vo hawuwutela nduku diui! Embuledi mbeyaka vati: Kristu kendi, uka? 27 Keli shu mbeyaka lene uyi untu one. Lam'ayene Kristu, nduku untu layeya lene uyendi. 28 Ku Jesu akahangohanggo l'etemwelo etsha antu ati: Dimi kundja lu lulanglu lami. Nyu mbeyakami, la nyu mbeyaka lene uyemi. One lakantumi eli mete ku nyu hanyeyi. 29 Dimi mbeyaka, ne dia dimi lambuya uma le ndi, ndi kakantumi. 30 Ku vo wakayangi mbunda. Keli nduku untu lakawahe anya, ne dia etena kandi katakuki. 31 Keli antu efula wa l'ului wakawetawo; wakati vati: Undi, lam'ayene Kristu, ndi ayutsha tulimbitelu tuleki tone tatsha untu one?

32 Afarise wakuki aui wa ului w'antu wangunangunela; ku elombedi a waki la Afarise wakatumi asi mbalasa dia ntuwunda. 33 Ku Jesu akati ati: Dimi layutshikala la nyu etenyi ka tshitshe, ku layutsho le one lakantumi. 34 Nyu nyayunyanga, ku

hanyomena. Nyu hanyeya nkuma lu dihuli diayumuyala. 35 Asi Juda wakambwana vati: Lendi ayutsho untu one, ahateya mbêna? Ndi ayutsho le wane wakadiangana l'atei w'asi Ngirika, ndu ayutetsha asi Ngirika? 36 Kitshimudi yakona ya diui diutshindi ati: Nyayunyanga, ku hanyomena? ndu ati: Nyu hanyeya nkuma lene ayumuyala?

Naka Untu la Pusa

37 Lushi l'ekumelu ka dambu, laki lushi la wuki. Jesu akemala, akahangohango ati: Naka untu la pusa, ayi le mi, ayono. 38 Ekedî w'ashi a lumu wayokela l'utema wa one lambêtawo, uku wata afundelu. 39 Diui dia Nyuma diakandati ne, diaki dia Nyuma nkahumba wane wakawetawo nungula. Nyuma atayala, ne dia Jesu atatumbwama.

40 Lam'akuki ului w'antu aui aso, amotshi wakati vati: Mete, mete, umvutshi mbendi. 41 Akina wakati vati: One eko Kristu. Keli amotshi wakambula vati: Kristu mbeyaka ndja uma la Ngalili uka? 42 Undi, efundelu hati ati: Kristu ayuyala kanula ya Davidi, ayuya uma la Betelehema, lu ngelu kaki Davidi? 43 Okone ului w'antu wakatana lu dikambu diandi. 44 Amotshi wakalangi mbunda, keli nduku untu akawahe lunya.

Nduku Untu Akateketa Okone

45 Asi mbalasa wakakalula le elombedi a waki la Afarise. Ku vo wakawambula vati: Ukundi ahanyayi la ndi? 46 Asi mbalasa wakâkaluya diui vati: Nduku untu edja ndu kakiante akateketa wuhu oso. 47 Ku Afarise wakâkaluya diui vati: Undi, ndu nyu mbambunganyama? 48 Embuledi kana Afarise wambuwetawo uka? 49 Keli ului w'antu ako waheyi elembe, wambudjama mananu. 50 Nikodemo, omotshi lakayi le ndi ntundu, akawambula ati: 51 Undi, elembe asu mamiaka untu la ntundu watuki aui andi, ndu wateyi dikambu diutshindi? 52 Vo wakûkaluya diui vati: Ndu we keli usi Ngalili? Uyangiyangia wulu, ku we ayena wati: Umvutshi hatuyakaka uma la Ngalili.

Umuntu Lakawandi la Luseka

8 Ku untu l'untu akakalula utsha lakandi. Keli Jesu akatshu l'Ukungu w'Ewelî. 2 Jesu akayi la kiesekese lu etemwelo ntu. Antu efula wakayi le ndi. Ndi akadjase, akawaetsha. 3 Afundji la Afarise wakayi la umuntu omotshi lakawandi l'useka. Lam'akawaweme l'atei, 4 vo wakawutela vati: Umbetsha, wakandji umuntu one l'useka,

tshu-k'anya. 5 Mose akatutela l'elembe ati: Nyuki wuhu w'antu aku ave. Keli we, ukundi wataye na? 6 Wakati osoku, wuhimbwa, dia vo ndjala la dikambu dia mbôsongwela. Keli Jesu akanya, akafundi lu kete la luhita. 7 Lam'akawakolamela mbumbula, ndi akanyo, akawambula ati: One laha la dikambu dia kolo l'atei anyu, atatela mbûka dive. 8 Ndi akanya, akafundi lu kete la luhita. 9 Lam'akawuki diui so, vo wakamo otoi otoi, wakatatela uma le one lakaleki ekumanyi pulu ndu le one la ndjihelu. Wakatshiki Jesu ndame la umuntu kam'akindi l'atei. 10 Jesu akanyo, akawumbula ati: Umuntu, lend'ewo na? Nduku untu lukamisha? 11 Ku ndi akati ati: Khumadiiondo, nduku untu. Jesu akati ati: Ndu dimi hakamia. Tshoka, tutshaki kolo ntu.

Yanyi ya wa la Kete Mbemi

12 Jesu akawatela ntu ati: *Yanyi ya wa la kete mbemi*. One landjela, hakendakenda lu udjima, keli ndi ayuyala la *yanyi ya lumu*. 13 Ku Afarise wakawutela vati: We ambuyata. Diui diaye kema mete. 14 Jesu akâkaluya diui ati: Naka dimi ndjataksi, keti diui diamî mete kedio; ne dia dimi mbeyaka uma lene uyemi, ndu utsha lene atamatshu. Keli nyu hanyeyi uma lene uyemi, ndu utsha lene atamatshu. 15 Nyu nyatulumbuyaka uku dimba. Dimi halumbuya untu. 16 Ee, naka dimi latulumbuyaka, keti elumbwelu kami keko mete, ne dia dimi kema dime, keli dimi la Papa lakantumi. 17 Lu elembe anyu nfundama ati: Diui dia emenyi ehendi dieko mete. 18 Dimi latuyataka, ndu Papa lakantumi atumyutaka. 19 Vo wakawumbula vati: Lend'eli sho na? Jesu akâkaluya diui ati: Nyu hanyumbeyi, hanyenyi Papa. Utunyumbeyi, tshiki nyu mbeyaka ndu Papa. 20 Aui aso mbakandati lu dihuli di'ekitshelu, lam'akandetshaka antu l'etemwelo. Nduku untu akawundi, ne dia unya andi atakuki.

One Lakantumi Eko la Mi

21 Jesu akawatela ntu ati: Layutsho, nyayunyanga, nyayovo lu kolo kanyu. Nyu hanyeyi ndja lene atamatshu. 22 Ku asi Juda wakati vati: Ndi mvutaka ati: Nyu hanyeyi ndja lene atamatshu, undi, ndi ayuyadiaka? 23 Ndi akawatela ati: Nyu nyeko wa lasi, dimi leko la l'ulungu. Nyu nyeko wa la la kete nye, dimi kema la la kete nye. 24 Dimi lakanyutela nti: Nyu nyayovo lu kolo yanyu. Naka nyu hanyumbetwo nyati: Dimi keli ndi, nyu nyayovo lu kolo

yanyu. 25 Ku vo wakawumbula vati: Akona eye? Jesu akawatela ati: Dimi keli nd'ako lakamanyutela umak'etatu. 26 Dimi la akambu efula wa mvuta ndu wa nembuya lu dikambu dianyu. Keli one lakantumi, eko mete. Akambu ako wakamuki mbatelami wa la kete. 27 Vo kumbeya vati: Ndi ambuwatela dikambu dia Shi. 28 Jesu akawatela ati: Lam'ayunyunya On'a untu, nyayeya nyati: Dimi keli ndi. Ndu dimi dime halatshi dikambu, keli latutaka akambu wakambetsha Papa. 29 One lakantumi eko la mi; ndi kuntshikami dime, ne dia dimi latutshaka akambu watôngenyangenyaka nshi tshe. 30 Lam'akandati aui aso, efula wakawetawo.

Tukanula ta Abarahama ta Mete

31 Jesu akatela asi Juda wakawetawo ati: Naka nyu nyayutshikala lu diui diam, keti ambeki ami mete mbenyu. 32 Nyu nyayeya akambu wa mete, ku akambu wa mete wayunyutshungula. 33 Vo wakukaluya diui vati: Tukanula t'Abarahama mbesu. Shu kundjala fumbi y'untu edja ndu kakiane. Ukundi wataye vati: Nyu nyayutshungo?

34 Jesu akâkaluya diui ati: Mete, mete, kanyutelami nti: Untu tshe latutshaka kolo, eko fumbi ka kolo. 35 Fumbi hatuyalaka lu luudu pundju, keli Ona katuyalaka loko pundju. 36 Okone naka Ona ayunyutshungula, mete nyu nyayutshungo. 37 Dimi mbeyaka nti: Tukanula t'Abarahama mbenyu. Keli nyu nyatuyangaka ndjakami, ne dia diui diam kema la dihuli l'etema anyu. 38 Dimi latutaka akambu wakamenyi uma le Papa, ndu nyu nyatutaka akambu wakanyeniyi uma le shenyu.

39 Vo wakukaluya diui vati: Abarahama keli tshesu. Jesu akawatela ati: Utunduyala tukanula t'Abarahama mbenyu, tshiki nyututshaka uku akatshaka Abarahama. 40 Keli kakiane nyu nyangaka ndjakami, dimi lunyutedi akambu wa mete, wakamuki uma le Unyashungu. Keli Abarahama kuntsha osoku. 41 Nyu nyatutshaka uku atutshaka shenyu. Vo wakawutela vati: Shu kumbuto lu luseka; teko la Shesu otoi, ee, Unyashungu. 42 Jesu akawatela ati: Utunduyala Unyashungu keli Shenyu, tshiki nyutunanga, ne dia dimi lambuya uma le Unyashungu. Dimi kundja lu lulangu lami, keli ndi kakantumi. 43 Okoko wana wahanyashihudia aui watami? Paka ne dia nyu kema la wulu wa nunga diui diam. 44 Ana wa uhimbanyi shenyu mbenyu. Nyu nangaka ntsha uku

shenyu. Uma l'etatelu ndi aki udjakanyi. Ndi hatemalaka lu mete, ne dia mete kema l'utema andi. Lam'atandi kashi, ndi atutaka akambu weli l'utema andi ndame. Ne dia kanga kashi kendi, ndu shi kashi. 45 Keli ne dia dimi latutaka mete, mbahanyambetawo. 46 Akona ayunyimbula dia dikambu dia kolo? Naka mete katami, ukundi ahanyambetawo? 47 Untu a Unyashungu atutaka akambu a Unyashungu. Nyu hanyuwaiki, ne dia nyu kema wa Unyashungu.

48 Asi Juda wakukaluya diui vati: Shu kumvuta mete shati: Usi Samariya keye, ndu kanga odienge, uka? 49 Jesu akâkaluya diui ati: Dimi kema la odienge, keli latolemiaka Papa, nyu nyatomonyolaka. 50 Keli dimi hayangi lutumbu lami dime. Ukina eko latuyangaka, latulumbuyaka. 51 Mete, mete kanyutelami nti: Naka untu ayukitanya diui diam, ndi havu pundju. 52 Asi Juda wakawutela vati: Kakiane shu tambeya shati: Kanga odienge keye. Abarahama akavu, ndu amvutshi. Keli we mvutaka wati: Naka untu ayukitanya diui diam, ndi hunganelia nyoi pundju. 53 We kuleki tshesu Abarahama lakavu, ndu amvutshi, uka? Akona ayafanya la ndi? 54 Jesu akakaluya diui ati: Naka dimi layuyatumbula, lutumbu lami leko anyanya. Papa kutuntumbulaka, one latunyutaka nyati: Unyashungu asu mbendi. 55 Nyu kumbéya. Utunduyala dimi layuta nti: Halaweyi, dimi lutuyala kanga kashi uku nyu. Keli dimi mbeyaka, la latukitanyiaka diui diandi. 56 Tshenyu Abarahama akangenangena dia mena lushi lami. Ndi akalenyi, ku akangenangena. 57 Ku asi Juda wakawumbula vati: Deku diaye diatakuaki akumi atanu, we akenyi Abarahama uka? 58 Jesu akawatela ati: Mete, mete, kanyutelami nti: La ntndu watuti Abarahama dimi laki kamemi ane. 59 Ku vo wakatongona ave dia mbuka, keli Jesu akayashe, akatumbi uma l'etemwelo.

Afarise Wambumbula Untu Lakuto Tshungu

9 Lam'akatetaka Jesu, ndi akenyi untu lakuto tshungu. 2 Ambeki andi wakawumbula vati: Umbetsa, akona akatshi dikambu dia kolo, untu one kana ambutshi andi, dia ndi mbuto tshungu? 3 Jesu akâkaluya diui ati: Untu one kuntsha dikambu dia kolo, kuyangga ambutshi andi. Keli dikambu ne diakayala, dia akambu watsha Unyashungu wenami le ndi. 4 Dieli la su dia ntsha elimu wa lakantumi lam'eki yanyi. Utshu ayuya,

etenkaheyi untu ntsha ulimu. 5 Lam'ekimi la kete, dimi keli yanyi ya wa la kete. 6 Lam'akandati osoku, ndi akahongola losoila kete, akalosohanya la kete, akûdisilo lu ashu. 7 Ndi akawutela ati: Tshoka, toke l'ungunda wa Siloama (kitshimudi ati: Akatumama). Ku ndi akatshu, akatoka, akakalula ayasene. 8 Ku asukanyi andi la wane wakaweniyi ntundu vati: Olombi mbendi, wakambula vati: Aha nd'ako lakadjaseka alomba one? 9 Amotshi wakati vati: Nd'uku. Akina wakati vati: Kema, keli ambufana la ndi. Ndi akati ati: Dim'one. 10 Ku vo wakawumbula vati: Ukundi ambuyosena? 11 Ndi akakaluya diui ati: Untu letawo vati: Jesu kakasohanyisha kete, ku ndi akandjishiyu lu ashu ami. Ndi akamvutedi ati: Utshu l'ungunda wa Siloama, utoke. Ku dimi lakatshwi, lakatoka, lakasenyi. 12 Ku vo wakawumbula vati: Lend'endi na? Ndi akati ati: Haleyi.

Afarise Wambumbula Untu Laki Tshungu

13 Vo wakayi la one laki tshungu le Afarise. 14 Lushi lakasohanya Jesu kete, la lakandasenya ashu andi, laki lushi l'ekila. 15 Ku Afarise ntu wakawumbula vati: Wuhu akona wakandakosenyisha? Ndi akawatela ati: Ndi akadjishi kete ya losohanya lu ashu, lakoki, ku lambosena. 16 Ku Afarise amotshi wakati vati: Untu one hayi uma le Unyashungu, ne dia ndi hatulamaka lushi l'ekila. Keli akina wakambula vati: Ukundi eya untu a kolo ntsha tulimbitemu tone? Okone vo wakatana. 17 Ku vo wakambula laki tshungu vati: Ataye dia untu one lu dikambu diakandakosenyisha? Ndi akati ati: Umvutshi mbendi.

18 Ku asi Juda kumbetawo dikambu diandi vati: Ndi aki tshungu ku ambosena, edja ndu lam'akaweti ambutshi wa one lakasene. 19 Vo wakawumbula vati: On'anyu latanyu nyati: Akuto tshungu one? Ukundi ambudosena kakiane? 20 Ambutshi andi wakakaluya diui vati: Shu mbeyaka shati: Ndi eko on'asu, lakuto tshungu. 21 Keli shu hateyi okone ambondosena kakiane. Hateyi lakôsenyisha. Nyuwumbuli, ndi aya ekumanyi, ndame ayunyutela. 22 Ambutshi andi wakati aui aso, ne dia vo wakuki asi Juda woma. Ne dia asi Juda wakasangi lulimi vati: Naka untu ayuwetawo ati; Ndi keli Kristu, ku vo mbutundja uma l'etemwelo. 23 Diako mbakati ambutshi andi vati: Ndi aya ekumanyi, nyuwumbuli.

24 Vo waketi laki tshungu ntu; wakawumbula vati: Utumbuli Unyashungu.

Shu mbeyaka shati: Pami kene eko untu a kolo. 25 Ku ndi akakaluya diui ati: Kana untu a kolo kendi, dimi haleyi. Dikambu otoi mbeyami nti: Dimi laki tshungu, kakiane lambosena. 26 Ku vo wakawumbula vati: Akandakutshedii na? Ukundi akandakosenyisha? 27 Ndi akâkaluya diui ati: Lakanyutedi ayi, keli nyu hanyuki. Okoko wana walanganyu diuka ntu? Undi, ndu nyu mbalanga njala ambeki andi? 28 Ku wakötengen vati: We keli umbeki andi, keli shu ambeki wa Mose mbesu. 29 Shu mbeyaka shati: Unyashungu akateketaka la Mose, keli untu one hateyi lene uyendi. 30 Ndi akâkaluya diui ati: Oso eko dikambu dia mamba, ne dia ndi akasenyisha, keli nyu hanyeyi uma lene uyendi. 31 Shu mbeyaka shati: Unyashungu hukela untu a kolo. Keli naka unto ambôtemola ndu ambutsha lulangu landi, ndi atukelaka unto oso. 32 Umak'etatelu k'andja, watuki dikambu dia unto lakasenya ashu wa unto lakuto tshungu. 33 Utunduyala untu one kema uma le Unyashungu, tshiki ndi heyi ntsha nduku dikambu. 34 Vo wakûkaluya diui vati: We akuto paka lu akambu wa kolo atu, ku we ambutetsha uka? Ku vo wakawutshanya.

Jesu Ambuyashula le One Laki Tshungu

35 Jesu akuki ati: Vo wambutshanya one laki tshungu. Lam'akandawenyi, ndi akawumbula ati: We ambetawo On'a Unyashtmgu? 36 Ndi akakaluya diui ati: Khumadiondo, na ndi, keli mbetawo? 37 Jesu akawutela ati: We uku awena. Ndi kateketa la ye. 38 Ndi akati ati: Khumadiondo, dimi lambetawo. Ku ndi akôtemola. 39 Jesu akati ati: Dimi lakayi la kete dia ndjulumbuya, dia wane wahasene wasene, dia wane wasena wayali tutshungu. 40 Afarise waki la ndi, wakuki aui aso, wakawumbula vati: Ndu shu mbeli tutshungu? 41 Jesu akawatela ati: Utunduyala nyu nyaki tutshungu, tshiki nyu kema la kolo. Keli kakiane, nyu mvutaka nyati: Shu menaka. Ku kolo kanyu kambutshikalaka.

Wela wa Lukumbu l'Ekoko

10 Mete, mete kanyutelami nti: One lahoto lu suku dia lukumbu l'ekoko, lambela amakina, uvi la opotodi mbendi. 2 Keli one latotoka lu suku, eko ulami w'ekoko. 3 Ulami a suku atûdihulaka; ekoko watukaka diui diandi. Ndi atetaka ekoko andi kumbu, atêlombolaka utsha l'andja. 4 Lam'atundutundjaka ekoko andi

JOANI

tshe, ndi atetaka la ntundu kawo. Ekoko watüyelaka, ne dia vo mbeyaka diui diandi. 5 Vo hawuyeli unto ukina, keli vo wayülawo, ne dia vo haweyi diui dia antu akina. 6 Wela oso mbakawaukela Jesu, keli vo kunshihudia akambu wakandawatela.

Ulami w'Ololo w'Ekoko

7 Jesu akawatela ntu ati: Mete, mete kanyutelami nti: Suku di'ekoko mbemi. 8 Tshe wakayi la ntundu kami, weko evi la apotodi. Keli ekoko kumbaikela. 9 Suku mbemi: layoto le mi ayushimbamelia, ayotoka, ayutumbaka, ayutanaka adiyu wa nde. 10 Uvi hayi uyaya, atuyakaka paka dia mvua, dia ndjaka ndu dia nanya. Dimi lakayi dia antu ndjala la lumu, la dia vo ndjala la lo efula. 11 Dimi leko ulami w'ololo w'ekoko. Ulami w'ololo w'ekoko atuvwelaka ekoko. 12 Ufutami, laha ulami, laha kanga ekoko, lam'ayundenia laundu ayayi, ayutshika ekoko, ayulawo; laundu ayéhandjula. 13 Ndi ayulawo, ne dia ndi eko ufutami; ndi hakanelka ekoko. 14 Dimi leko ulami w'ololo w'ekoko. Dimi mbeyaka ekoko ami, ndu vo mbeyakami. 15 Uku ambeja Papa, mbaweyami. Dimi lambukimo lumu lami lu dikambu dia ekoko ami. 16 Dimi leko la ekoko ekina waha lu lukumbu lone. Dieli la mi dia mbéla ndu vo. Vo wayuka diui diam, wayuyala ului otoi ndu ulami otoi. 17 Dia dikambu so mbananga Papa, ne dia dimi lambukimo lumu lami dia losa ntu. 18 Nduku untu lampotolalo, keli dime lambulukimo. Dimi la wulu wa lukimo, ndu la wulu wa losa ntu. Olembe oso mbakamalungula uma le Papa.

Antu Wambudja Tamu Ntu lu Dikambu Dia Jesu

19 Asi Juda wakatana ntu ne dia aui wa Jesu. 20 Efula kawo wakati vati: Ndi eko la odienge; ndi ambudjo dadi. Ukundi alunganyau aui andi? 21 Akina wakati vati: Aui aso kema wa kanga odienge. Odienge mbeyaka nsenya akanga a tutshungu?

Lu Dambu di'Ekidielu ka Etemwelo

22 Dambu di'Ekidielu k'etemwelo diakayala la Jerusalema. 23 Aki nshi ya tshitshi, Jesu akatakendakenda lu etemwelo lu mbalasa ka Solomona. 24 Ku asi Juda wakawumbula vati: Edja ndu kaandi ayuyukimo ntutshimbiatshimbia? Naka we keli Kristu, utuhunweli. 25 Jesu akákaluya diui ati: Dimi lakanyutela, ku

nyu hanyumbetawo. Elimu watshami lu lukumbu la Papa, vo mbamvuta. 26 Keli nyu hanyumbetawo ne dia nyu kema wa lu ekoko ami. 27 Ekoko ami watukaja diui diam. Dimi mbaeyaka, vo watundjelaka. 28 Dimi mbashaka lumu la pundju. Vo hawuwo pundju. Nduku untu ayuwahotola uma lu lunya lami. 29 Papa lakambishawo, kuleki tshe. Nduku untu leli la wulu wa mbahotola uma lu lunya la Papa. 30 Dimi la Papa teko otoi.

31 Asi Juda wakatongona ave ntu dia mbúka. 32 Jesu akákaluya diui ati: Dimi lakanyenya etsha efula w'ololo uma le Papa. Dikambu diakona diutshimi, diambukanyu aye? 33 Asi Juda wakúkaluya diui vati: Shu hatukuki ave ne dia etsha aye w'ololo, keli ne dia lotengo laye; ndu ne dia we untu, ambuyafanya la Unyashungu. 34 Jesu akákaluya diui ati: Undi, hafundami l'elembé ati: Dimi lakati nti: Nyu nyeko ditemolatemola? 35 Naka ndi aketi wane wakayakaka diui dia Unyashungu le wo ati: Ditemolatemola (afundelu haweyama ndjakema). 36 Ku nyu mvutaka dia one lakakidka Papa, lakandatumi la kete, nyati: We ambotenga Unyashungu; ne dia dimi lakati nti: Dimi leko On'a Unyashungu? 37 Naka dimi hatutshaka elimu wa Papa, tanyumbetawoki. 38 Keli naka dimi latuwatshaka, kuyanga nyu hanyumbetawo, nyetawo etsha eku. Dia nyu mbeya la nimbitela nyati: Papa eko l'utema ami, la dimi leko l'utema a Papa. 39 Vo wakayangi mbunda ntu, ku ndi akahoso uma l'anya awo.

Jesu Ambukalula la Wedi a Jorodana

40 Jesu akatshu ntu la wedi a Jorodana, lene akabatizaka Joani ntundu. Ndi akahangi leko. 41 Antu efula wakayi le ndi; wakati vati: Mete, Joani kuntsha nduku djimbitelu. Keli akambu tshe wakati Joani dia untu one, waki mete. 42 Efula wakawetawo leko.

Jesu Ambuka Dia Kandji ka Lazaro

1 Pami kemotshi aki la hemo, lukumbu landi Lazaro, usi Betaniya, ngelu ka wa Mariya la Mata onangu. 2 Mariya oso, lakakiti Khumadiondo malashi, lakakitula ekulu andi la divu diandi, Lazaro onangu kaki la hemo. 3 Ku akadiyendi wakatumu diui le Jesu vati: Khumadiondo, ulungi, one latuyulangaka, eko la hemo. 4 Keli lam'akuki Jesu diui so, ndi akati ati: Hemo keso aha ka nyoi, keli ne dia lutumbu la Unyashungu,

ne dia On'a Unyashungu atumbwami lu dikambu diako.

5 Jesu akukaka Mata la onangu Lazaro ngandji. 6 Ku lam'akanduki ati: Ndi la hemo, ndi akadjase lene akindi nshi hyendi. 7 L'okongo diku, ndi akatela ambeki andi ati: Tutshu la Judiya ntu. 8 Ambeki wakawutela vati: Umbetsha, asi Juda waki lu nyanga nkuka ave nshi nye, ku we utatshu utsha leko ntu? 9 Jesu akâkaluya diui ati: Aha eshidi dikumi la ehendi mbeli lu lushi otoi? Naka untu ayokendakenda la yanyi, ndi hatakana ne dia ndi menaka yanyi ya andja ane. 10 Keli naka untu ambokendakenda l'utshu, ndi ayutakana, ne dia yanyi kema l'utema andi. 11 Akambu aso mbakandati. L'okongo diku, ndi akawatela ati: Ongenyi asu Lazaro ambetama lu djo. Dimi lambutsho keli ntuwemuli uma lu djo. 12 Ambeki wakawutela vati: Khumadiondjo, naka ndi oso ambetama lu djo, keti ndi ayokono. 13 Jesu akati dikambu dia nyoi kandi, keli vo wakakani vati: Dia mbetama djo mbatandi. 14 Ku Jesu akâhunwela ati: Lazaro akavvi. 15 Dimi lambonganengena dia dikambu dianyu, ne dia dimi taki leko, dia nyu mbetawomi. Tutshu le ndi. 16 Ku Tomasi, letawo vati: Diasa, akatela anyandi ambeki ati: Nyeso tutshu, katutuvu la ndi.

Jesu Ambulula Lazaro Uma lu Nyoi

17 Lam'akayi Jesu, ndi akatani Lazaro aya nshi nyei lu diumbu. 18 Betaniya aki lasuki la Jerusalema, uku kilometere shatu. 19 Asi Juda efula wakayi le Mata la Mariya dia ndjâsamba lu nyoi ka onengewo. 20 Ku lam'akuki Mata ati: Jesu kayayi, ndi akatshu dia ntulungula, keli Mariya akatshikala udjashi lu luudu. 21 Ku Mata akatela Jesu ati: Khumadiondjo, utuyulya lindu, tschiki onalingu kumvo. 22 Ndu kakiane, dimi mbeyaka nti: Unyashungu ayukusha tshe kayuyôlomba. 23 Jesu akawutela ati: Onanyo ayulo. 24 Mata akawutela ati: Dimi mbeyaka nti: Ndi ayulo lu eulwelu ka lushi l'ekumelu. 25 Jesu akawutela ati: Dimi leko eulwelu la lumu. One lambetawo, kuyanga ndi ayovo, ayuyala la lumu. 26 One leli la lumu, lambetawo, ndi havu pundju. We mbetawoka diui so? 27 Ndi akawutela ati: Elu, Khumadiondjo. Dimi lambetawo nti: We eko Kristu, On'a Unyashungu. Ndi kayayi la kete.

28 Lam'akandati osoku, ndi akatshu, aketi Mariya onangu lu usheshe, akawutela ati: Umbetsha one aketa. 29 Lam'akanduki

diui so, ndi akunela esadi, akatshu le ndi. 30 Laso ku Jesu atakumi la ngelu, keli eki lene akasangana Mata la ndi. 31 Asi Juda waki la Mariya lu luudu, wakûsambaka. Lam'akawawenyi ambunela esadi, ambutumba, vo wakuyeli. Vo wakakani vati: Ndi ambutsho la diumbu dia ntulela. 32 Lam'akayi Mariya lene aki Jesu, lam'akandawenyi, ndi akako l'ekulu andi. Ndi akawutela ati: Khumadiondjo, utunduyala we aki lindu, tschiki onalingu kumvo. 33 Lam'akawenyi Jesu alela, ndu asi Juda waki la ndi walela, ndi akakhumi l'utema; akanyangi wulu. 34 Ndi akambula ati: Lendi akanyukhunde na? Vo wakawutela vati: Yeti, utendi. 35 Jesu akaleli. 36 Ku asi Juda wakati vati: Nyendi okone akandulanga! 37 Keli amotshi wakati vati: Untu one akasenya kanga tshungu, ndi ntutundyea nshimbela ndu untu one, diaha ndi mvo?

38 Ku Jesu akayi la diumbu, ayakhumi ntu l'utema. Diumbu diako diaki wuku a lu dive. Dive dimotshi diakadifela. 39 Jesu akati ati: Nyunya dive. Mata, kadiya one lakavu, akawutela ati: Khumadiondjo, udu aya sulu, ne dia aya nshi nyei loko. 40 Jesu akawutela ati: Dimi hakutedi nti: Naka we ayetawo, we ayena lutumbu la Unyashungu? 41 Ku vo wakanya dive. Jesu akedia ashu, akati ati: Papa, lambukuka lusaka ne dia we mbukelakami. 42 Dimi lakeyi nti: We atumbukelaka nshi tshe. Keli lambuta diui ne, ne dia ului w'antu wunyingi, wetawo vati: We kakantumi. 43 Lam'akandati osoku, ndi akati la diui dia wulu ati: Lazar, tumba! 44 One lakavu akatumbi ombami ahondo wa diumbu, ndu l'anya ndu l'ekulu. Elundji kandi kakombami la kitambala. Jesu akawutela ati: Nyuwombole, ndi atshu.

Afarise Wambudja Sheki ya Ndjaka Jesu(Mat. 26:1-5; Mak. 14:1-2; Luk. 22:1-2)

45 Asi Juda efula, wane wakayi la Mariya, wakenyi dikambu diakatshi Jesu, wakawetawo. 46 Keli amotshi wakatshu le Afarise, wakawatela akambu wakatshi Jesu. 47 Elombedi a waki la Afarise wakasangana, wakambwana vati: Atshas na? ne dia untu one ntshaka tulimbitelu efula. 48 Naka shu tayutshika okone, keti antu tshe mbêtawo. Ku asi Romo wayuya, wayosa kete yasu la wudja asu. 49 Keli omotshi l'atei awo, lukumbo landi Kayifasi, laki olombedi a ladiku eleku kako, akawatela ati: Nyu hanyeyi nduku dikambu. 50 Nyu hanyukani

yimba nyati: Eko ololo dia untu otoi mvwela antu, dia antu wa wudja tshe tawuvokaki. 51 Ndi kumvuta diui so dikambu diandi ndame. Keli ne dia ndi aki olombedi a ladiku l'eleku kako, mbakandati diui ati: Jesu kayumvwela wudja. 52 Aha paka dia wudja one utu, keli dia nsanganya ana wa Unyashungu wakadiangana, vo wayali ului otoi. 53 Uma ka lushi loso, vo wakadji sheki dia mbudiaka.

Jesu Ambutsho la Efarayima

54 Jesu komenene ntu l'atei w'asi Juda. Keli ndi akamo uma leko, akatshu lu leke la lasuki l'usui, l'usumba wetawo vati: Efarayima. Ndi akahangi leko, ndi la ambeki andi.

55 Elekanelu k'asi Juda kaki lasuki. Antu efula wakamo lu beke diawo. Vo wakatshu la Jerusalema la ntundu ka Elekanelu dia ntuyaedia. 56 Ku wakayangi Jesu, wakemala lu etemwelo, wakambwana vati: Akananyu na? Nyati: Ndi huya lu dambu? 57 Elombedi a waki la Afarise wakadjanga vati: Naka untu mbeyaka len'endi, ndi atuteli, keli kawutuwundi.

Mariya Ambukita Jesu Malashi la Betaniya
(Mat. 26:6-13; Mak. 14:3-9)

12 Nshi shamalu yekiko la ntundu ka Elekanelu, Jesu akayi la Betaniya, lene aki Lazaro, lakandulula uma lu nyoi. 2 Ku vo wakukatela ma dia dikolo leko. Mata akâkambela ulimu. Keli Lazaro aki omotshi a wane waki la ndi lu mesa. 3 Mariya akose livere otoi la malashi wa narado w'ushinga wulu, akakiti Jesu lu akaka. Ndi akûkitula akaka la divu diandi. Luudu lakaluli too la upumu wa malashi. 4 Keli umbeki andi omotshi, Judasi Isakariyote, ona Simona, one laki la dikambu dia mbufunga, akambula ati: 5 Okoko wana wakiwo kunsundja malashi one lu denariyo kama shatu, dia mbisha akanga a weula? 6 Ndi akati diui so, aha ne dia ndi akakanelaka akanga a weula; keli ne dia ndi aki uvi, ndu aki la tapa diakandosaka diango diakawakitshaka loko. 7 Ku Jesu akati ati: Nyuwete, ankitshiya malashi one, edja ndu lushi layuwunkhunde. 8 Ne dia nyu la akanga a weula nshi tshe l'atei anyu, keli nyu kema la mi nshi tshe.

Wambuyanga Ndjaka Ndu Lazaro

9 Lam'akenyi ului a wuki w'asi Juda vati: Jesu eko leko, vo wakayi, aha lu dikambu diandi ntu, keli dia ndjaka ndu

Lazaro lakandulula uma lu nyoi. 10 Keli elombedi a waki wakambwana dia vo ndjaka ndu Lazaro, 11 ne dia uma lu dikambu diandi asi Juda efula wakatshu, waketawo Jesu.

Jesu Ambukuma la Jerusalema la Lutumbu

(Mat. 21:1-11; Mak. 11:1-11;
Luk. 19:28-40)

12 La wedi a pindju, ului a wuki w'antu wakayi lu dambu, wakuki vati: Jesu kayayi la Jerusalema. 13 Vo wakose wanga w'atuku, wakatshu dia ntûlungula. Vo wakahangohango vati: Hosana! One luyi lu lukumbu la Khumadiiondo, ee, Khum'ekanga ka Isariyele, atumbwami! 14 Lam'akenyi Jesu osongo a punda, ndi akahema ladiku diawo, uku ufundami ati: 15 Ona umuntu a Siona, tukaki woma. Enda, Khum'ekanga kaye ambuya, ayahemi ladiku dia osongo a punda. 16 Ambeki wa Jesu kumbeya akambu aso ntundu. Keli lam'akandatumbwama, vo wakuho vati: Akambu aso wakafundama dikambu diandi. Ndu vo wakûtshela akambu aks. 17 Ului w'antu waki kame la ndi, lam'akandeti Lazaro uma lu diumbu ndu lam'akandawulula uma lu nyoi, wakasanya dikambu diako. 18 Dia dikambu so mbakatshu ului w'antu dia ntûlungula, ne dia vo wakuki vati: Ndi akatshi djimbitelu sho. 19 Ku Afarise wakatanelu vati: Nyendi okone wahanyushimbi; enda, wa la kete tshe wambûyela.

Aui wa Jesu wa Ndjhelu la Ntundu k'Antu

20 Asi Ngirika amotshi waki l'atei a wane wakatshu dia ntotemola lu dambu. 21 Vo wakayi le Filipo, usi Betesayida ka la Ngalili, wakolombe vati: Khumadiiondo, shu nangaka mena Jesu. 22 Filipo akatshu, akatutela Andre. Filipo la Andre wakatshu, wakatutela Jesu. 23 Jesu akakaluya diui ati: Unya ambukuka dia On'a untu ntumbwama. 24 Mete, mete, kanyutelami nti: Naka lotongo l'upunga haloko lu kete, la haluvu, lo layuyala lame. Keli naka lo lambuvu, lo layoto tongo efula. 25 One latanga lumu landi, ambulushisha. One latuna lumu landi la kete nye, ayululama utsha lu lumu la pundju. 26 Naka untu ambunkambela ulimu, ndi andjeli. Ukambi ami ayuyala lene ayumuyala. Naka untu ayunkambela ulimu, Papa ayôlemia.

27 Kakiane utema ami ambudidima. Kayumuta na? Papa, unshimbeli uma lu unya one. Keli dimi lakayi lu unya one dia

dikambu ne. 28 Papa, utumbuli lukumbu laye. Ku diui diakayi uma l'ulungu ati: Dimi lambutumbula, layulutumbula ntu. 29 Ului w'antu wakemadi lawo, wakuki diui diako, wakati vati: Dikhungula so. Akina vati: Dikendji dia Unyashungu dimotshi mboteketshi la ndi. 30 Jesu akakaluya diui ati: Diui so hadiuyi dikambu diamni, keli dikambu dianyu. 31 Elumbwelu ka kete nye keko kakiane. Kakiane umbuledi a kete nye ayukadjema. 32 Ku lam'ayumunyama uma lu kete, layukutula antu tshe uya le mi. 33 Ndi akati osoku, dia mbaewuya dia wuhu a nyoi kayunduwo. 34 Ului w'antu wakukaluya diui vati: Takuki uma l'elembe vati: Kristu atuyalaka pundju. Ya ukundi ataye wati: Dieli la On'a untu muniyiyama? Akona oso eli On'a untu? 35 Ku Jesu akawatela ati: Yanyi yayuyala etenyi ka tshitshe ketu l'atei anyu. Nyutetshi lam'ekinyu la yanyi, udjima atukunyutana. One leteta lu udjima, heyi lene atandatshu. 36 Lam'ekinyu la yanyi, nyetawo dia nyu ndjala ana wa yanyi.

Euhwelu ka Dikambu Dia Jesu

Akambu aso mbakati Jesu, ku ndi akatshu, akatuwashama. 37 Keli kuyanga mbakandatshaka tulimbitelu efula osoku la ntundu kawo, vo kumbétawo. 38 Ne dia nshidiya diui dia umvutshi Isaya diakandati ati: Khumadiondjo, akona aketawo diui diasus? Le na akenama lunya la Khumadiondjo? 39 Dia dikambu ne mbakiwo kumbetawo, ne dia Isaya akati ati: 40 Ndi akuli ashu awo, akakikitsha etema awo, Ne dia vo ntawenaki la ashu awo, taweyaki la etema awo. Tawukadimoki dia dimi mbakonoya. 41 Akambu aso mbakati Isaya ne dia ndi akenyi lutumbu landi. Ndi akati dikambu diandi. 42 Keli embuledi efula wakawetawo. Keli vo kundjashula, ne dia Afarisé watukâtundja uma l'etemwelo; 43 ne dia vo wakaleki nanga lutumbu l'uma le antu uleki l'uma le Unyashungu.

Jesu Ambuta Ntu Dikambu Diakandayi la Kete

44 Jesu akahangohango ati: One lambetawo, hambetawo dime, keli ambetawo one lakantumi. 45 One latomenaka, atenaka lakantumi. 46 Dimi lakayi uku yanyi la kete, Dia untu tshe layumbetawo, tayalaki lu udjima. 47 Naka untu ayuka aui ami, ku ndi hikitanya, dimi halulumbuya. Ne dia dimi kundja dia ndjulumbuya wa la kete, keli dia ndjâshimbela. 48 One latuna, lahalungula

aui ami, ndi eko la one layûlumbuya. Diui diatami, mbayûlumbuya lushi l'ekumelu. 49 Ne dia dimi kundjata dime. Keli Papa lakantumi, kakambisha oleme uku ayumuta ndu wuhu wayumoteketa. 50 Dimi mbeyaka nti: Oleme a Papa eko lumu la pundju. Akambu watami, dimi latuwataka uku akamvutela Papa.

Jesu Ambotsha Ekulu wa Ambeki Andi

13 La ntundu ka dambu di'Elekanelu, Jesu akeyi ati: Etena kami kambukuka ka dimi mumo uma la kete nye utsha le Papa, uku akandalangi antu andi la kete, osoku mbakandâlangi edja ndu l'ekumelu. 2 Lam'akawalekaka ma dia dikolo, ku uhimbanyi akashili mboto l'utema a Judasi Isakariyote, on'a Simona. 3 Jesu akeyi ati: Papa ambukimo akambu tshe l'anya ami, la dimi lambuya uma le Unyashungu, ndu layutsho le Unyashungu. 4 Ndi akunela uma la mesa, akakulula ahondo. Ndi akose dikundju dia mbudi, akalote. 5 Ku ndi akangula ashi lu donga, akatatel a mbotsha ekulu w'ambeki, la mbekitila la dikundju dia mbudi. 6 Ku ndi akayi le Simona Petero. Petero akawumbula ati: Khumadiondjo, we ayumbotsha ekulu? 7 Jesu akawutela ati: We heyi katshami kakiane, keli we ayushihudia l'okongo diku. 8 Petero akawutela ati: We hambotsha ekulu pundju. Jesu akûkaluya diui ati: Naka dimi halakotsha, keti we kema lu leke lami. 9 Simona Petero akawutela ati: Khumadiondjo, aha ekulu etu, keli nduanya ami ndu ote ami. 10 Jesu akawutela ati: One lambotshama, mpumbaka mbotsha paka ekulu andi etu, ku ndi ayediam tshe. Nyu nyambediama, keli aha nyu tshe. 11 Ne dia ndi akeyi one layûfunga, mbakandati ati: Aha nyu tshe mbambediama.

12 Lam'akandashili mbaotsha ekulu, ndi akose ahondo andi, akadjase ntu. Ndi akawumbula ati: Nyu mbeyaka dikambu diunyutshedimi? 13 Nyu mbetakami nyati: Umbetscha la Khumadiondjo. Ololo mbatanyu, osoku mbemi. 14 Ku naka dimi Khumadiondjo la Umbetscha lakanyotshisha ekulu, ndu nyu nyambuhumba mbotshanya ekulu. 15 Ne dia dimi lambunyusha djimbitelu ya ndu nyu ntsha, uku unyutshedimi. 16 Mete, mete, kanyutelami nti: Ukambi haleki uwandji andi. Ndu one lakatumama, haleki one lakutumi. 17 Naka nyu mbeyaka akambu ane, nyu nyayuyala la otshoko lam'ayunywatuwa. 18 Aha nyu tshe mbatami: dimi mbeyaka wane wakamasonola.

JOANI

Keli dieli la afundelu nshidiyama ati: One latolekaka ma diamni, kambompota ina. 19 Dimi lambutanyutedi kam'ahatayala dikambu. Okone lam'ayudiuyala, ku nyu nyayetawo nyati: Dimi oso. 20 Mete, mete kanyutelami nti: Lalungula one latumami, ndi ambunungula. Lanungula, ambulungula one lakantumi.

Jesu Ambuta Untu Layufunga (Mat. 26:20-25; Mak. 14:17-21; Luk. 22:21-23)

21 Lam'akati Jesu akambu aso, ndi akadidima l'utema; akati ati: Mete, mete, kanyutelami nti: Otoi anyu omotshi ayunfunga. 22 Ambeki andi wakendana wadja tamu l'etema vati: Untu akona atandi na? 23 Umbeki andi omotshi wakandalangaka aki la ndi lu mesa, uwekami lu tulu. 24 Ku Simona Petero akaweti l'epapi ka lunya, akawutela ati: Ututeli one latandi. 25 Lam'akandekami ekongokongo lu tulu ka Jesu, ndi akawumbula ati: Khumadiiondo, na ndi na? 26 Ku Jesu akukaluya diui ati: One layumosohela ukama a ma, layumuwusha, keli ndi. Ku lam'akandasohe ukama a ma, ndi akawusha Judasi, on'a Simona Isakariyote. 27 Lam'akandose ukama a ma, Satana akoto l'utema andi. Ku Jesu akawutela ati: Utshi dikambu diatshaye esadi. 28 Nduku untu laki lu mesa lakeyi dikambu diakandawutela diui so. 29 Ne dia Judasi aki la tapa, ku amotshi wakakani vati: Jesu ambuwutela ati: Usumbi diango diahubasne ne dia dambu, kuyanga dia mbisha asi wula engo kemotshi. 30 Lam'akandose ukama, kem'edja, ndi akatumbi; aki l'utshu.

Olembe w'Uyuyu

31 Lam'akandatumbi, Jesu akati ati: Kakiane On'a untu ambutumbwama, ndu Unyashungu ambutumbwama l'utema andi. 32 Naka Unyashungu ambutumbwama l'utema a Jesu, ndu Unyashungu ayutumbwama l'utema andi. Kem'edja, ndi ayutumbula. 33 Ana wa tshtishe, etenyi ka tshtishe ketu kekimi la nyu. Nyu nyayunya, keli uku akamatela asi Juda nti: Hanyeyi ntsho lene ayumutsho, osoku mbanyutelami kakiane. 34 Olembe w'uyuyu mbamumunyusha, dia nyu mbukana ngandji. Nyukani ngandji uku akamanyuki ngandji. 35 Uma lu dikambu ne, antu tshe wayeya vati: Ambeki ami mbenyu, naka nyu nyayukana ngandji.

Jesu Ambutela Petero Dia Langunu Landi (Mat. 26:31-35; Mak. 14:27-31; Luk. 22:31-34)

36 Simona Petero akambula Jesu ati: Khumadiiondo, lendi atayatshu? Jesu akukaluya diui ati: Kakiane, we heyi ndjelami lene ayumutsho, keli l'okongo diku, we ayundjela. 37 Petero akawumbula ati: Khumadiiondo, dikambu kuna diahamyei nkuyela kakiane? Dimi layukimo lumu lami dikambu diaye. 38 Jesu akukaluya diui ati: We kayukimo lumu laye lu dikambu diamni? Mete, mete, kakutelami nti: Lekeka lateki, we ayumanguna tena satu.

Daku Di'Elakanelu

14 Etema anyu tawudidimaki: nyetawo Unyashungu, nyumbetawo ndu dimi. 2 Lu luudu la Papa eko mvudu efula. Utunduyala aha osoku, tshiki lakanyutela, ne dia dimi lambutsho dia ntunyolongoswela dihuli. 3 Naka dimi lambutsho dia ntunyolongoswela dihuli, dimi layukalula la ndjunyulungula, dia nyu ndjala lene ayumulya. 4 Nyu mbeyaka mbuka katamatshu. 5 Tomasi akawutela ati: Khumadiiondo, shu hateyi lene atayatshu. Ukundi eyasu mbuka na? 6 Jesu akawutela ati: Dimi leli mbuka, mete la lumu. Nduku untu laya le Papa, tshikima uma le mi. 7 Utunduyala nyu nyakambeyi, tshiki nyu nyakeyi ndu Papa. Kakiane nyu nyambuweya, ndu nyakaweniyi.

8 Filipo akawutela ati: Khumadiiondo, utenya Shesu, ku dikambu so diayukuka. 9 Jesu akawutela ati: Dimi laki la nyu edja, ku we atambeysi, Filipo? One lakamenyi, akenyi Papa. Ukundi wataye wati: Utenu Shesu? 10 We hetawo wati: Dimi leko l'utema wa Papa, la Papa eko l'utema ami? Aui watumunyutelaka, hatuwataka dime, keli Papa leli l'utema ami, katutshaka elimu andi. 11 Nyumbetawo nyati: Dimi leko l'utema wa Papa, la Papa eko l'utema ami. Kuyanga aha osoku, nyumbetawo ne dia elimu ene etu.

12 Mete, mete, kanyutelami nti: One lambetawo, ndu ndi ayutsha elimu watumutshaka. Ndu elimu wuleki ene mbayundutsha, ne dia dimi layutsho le Papa. 13 Kene tshe kayunyolomba lu lukumbu lami, dimi layukitsha, ne dia Papa atumbwami le Ona. 14 Naka nyu nyayolomba dikambu lu lukumbu lami, dimi layuditsha.

Jesu Ambâlaka Ukimanyidi

15 Naka nyu nangakami, nyayukitanya elembe ami. 16 Dimi layolomba Papa, ku ndi ayunyusha Ukimanyidi ukina, one layuyala la nyu pundju, 17 Nyuma ka mete. Keli wa la kete haweyi mbulungula, ne dia vo hawuwenyi, hawuweyi. Nyu mbéyaka, ne dia ndi atuyalaka la nyu, ndu ayuyala l'utema anyu.

18 Dimi halanyutshiki ditshiki. Dimi layuya le nyu. 19 Étenyi ka tshitshe ketu, ku wa la kete hawomenyi ntu, keli nyu nyatomenaka. Ne dia dimi leko la lumu, ku ndu nyu nyayuyala la lumu. 20 Lushi loso, nyu nyayeya nyati: Dimi l'utema a Papa, la nyu l'utema ami, la dimi l'utema anyu. 21 One leli la elembe ami, ndu latékitaniyaka, ndi kananga. Untu lananga, ayulangema le Papa. Dimi layûlanga, layuyaenya le ndi. 22 Judasi (aha Isakariyote) akawumbula ati: Khumadiondjo, dikambu diakona diambuya dia we ndjaenya le su, aha le wa la kete? 23 Jesu akúkaluya diui ati: Lam'ayunanga untu, ndi ayukitanya diui diamí. Papa ayuwulanga, shu tayuya le ndi, tayudjase la ndi. 24 One lahanangi, hakitanya aui ami. Diui diukanyu, diaha diamí, dieko dia Papa lakantumi.

25 Dimi lambunyutela akambu aso lam'ekimi la nyu. 26 Keli Ukimanyidi, Nyuma k'Ekila, layutuma Papa lu lukumbu lami, ndi ayunyetsha akambu tshe, ayunyuhula aui tshe wakamanyutelaka. 27 Dimi lambunyutshikela ki. Ki kami kamumunyusha. Aha uku watushaka wa la kete mbamumunyusha to. Etema anyu tawudidimaki, tawukaki woma. 28 Nyu nyakuki diui diakamanyutela nti: Dimi layutsho, ku layukalula le nyu. Utunduyala nyu nyakanangi, tshilki nyutongenangena, ne dia dimi layutsho le Papa, ne dia Papa ambundeka. 29 Dimi lambunyutela dikambu so la ntundu dio diatayala, dia nyu mbetawo lam'ayudiuya. 30 Dimi handjunyutela akambu efula ntu, ne dia umbuledi a kete nye eco li ndjayi. Ndi kema la ema l'utema ami. 31 Keli dimi latutshaka uku elembe wakambisha Papa, dia wa la kete weyi vati: Dimi latulangaka Papa. Nyuneli. tutshu.

“Dimi Utundu w’Okodi Mete”

15 Dimi utundu w’okodi. mete. Papa eli ukambi. 2 Lutahi lami tshe latohato elua, ndi ayulunya. Lutahi tshe latotokaka elua, ndi ayulolongsola dia lo ndeka ntu elua efula. 3 Kakiane nyu nyambuyala pudipudi,

ne dia diui diakamanyutela. 4 Nyuyali l'utema ami, dimi ndjali l'utema anyu. Uku ahewi lutahi ntu elua lame, tshikima lo mbeli l'okodi, osoku ndu nyu hanyeyi ntu elua, tshikima nyu mbeli l'utema ami. 5 Dimi leko utundu w’okodi, nyu nyeko tahi. One layuyala l'utema ami, la dimi l'utema andi, ndi ayoto elua efula. Lam’ayunyuvala nyaha la mi, nyu hanyeyi ntsha nduku dikambu. 6 Naka untu hayala l'utema ami, ndi ayukadjema uku lutahi, ayolengela. Antu wayuyitshumanya, wayuyidja lu dja, ku yo wayutshumbama. 7 Naka nyu nyambuyala l'utema ami, la aui ami wambuyala l'utema anyu, nyolombe tshe kalanganyu, ku wayunyutshelato. 8 Uma lu dikambu so, Papa ayutumbwama, dia nyu ntu elua efula. Okone nyu nyayuyala ambeki ami. 9 Dimi lambunyulanga uku akanangi Papa. Nyuyali lu ngandji kami. 10 Naka nyu nyambukitanya elembe ami, nyu nyayuyala lu ngandji kami, uku akamakitanya elembe a Papa, wemi lu ngandji kandi. 11 Dimi lambunyutela akambu aso, ne dia ongenongeno ami ayali l'utema anyu, la dia ongenongeno anyu aluli.

Engenyi Ami Mbenyu

12 One eli olembe ami: nyukani ngandji, uku akamanyuki ngandji. 13 Nduku untu la ngandji kuleki kene ka mvwela engenyi andi. 14 Naka nyu nyambutsha uku anyutelami, keti engenyi ami mbenyu. 15 Dimi hanyeti ntu nti: Ekambi, ne dia ukambi heyi katsha uwandji andi. Keli dimi lambunyeta nti: Engenyi, ne dia lambunyewuya akambu tshe wakamuki le Papa. 16 Nyu konsonolami, keli dimi kambunyosonola, lambunyutuma dia nyu ntu elua, la elua anyu wayali pundju. Okone Papa ayunyusha kene tshe kayunyolomba lu lukumbu lami. 17 Dimi lambunyutela akambu aso, dia nyu mbukanan ngandji.

18 Naka wa la kete wambunyuhetsha, nyu mbeyaka nyati: Wakampetsha ntundu watanyuhetsha. 19 Utunyuala wa la kete, tshiki wa la kete wutulanga asikawo. Ne dia nyu nyaha wa kete, keli dimi lakanyosonola uma le wa la kete, diako mbanyuhetsha wa la kete. 20 Nyuho diui diakamanyutela nti: Ukambi haleki uwandji andi. Naka vo wakansuya, wayunyusuya ndu nyu. Naka vo wakikitanya diui diamí, wayukitanya ndu diui dianyu. 21 Keli wayunyutshela akambu aso tshe ne dia lukumbu lami, ne dia vo haweyi one lakantumi. 22 Utunduyala dimi kundja, kumbatela diui, tshiki vo kundjala

la kolo. Keli kakiane, vo hawukundja luha lu kolo yawo. 23 One latumpetshaka, atuhetshaka ndu Papa. 24 Utunduyala dimi kuntsha akambu l'atei awo wahatatshi nduku untu, tshiki vo kundjala la kolo. Keli kakiane, vo wambutena, wambutuhetsa dimi la Papa. 25 Keli dikambu so diambuyala, dia nshidiya diui diufundami lu elembe awo ati: Vo wakampetsha uhetsahetsha. 26 Keli lam'ayuya Ukimanyidi, wayumunyutumela uma le Papa, Nyuma ka mete, ndi ayumvuta. 27 Ndu nyu nyatumvutaka, ne dia nyu nyatuyalaka la mi umak'etatelu.

Oolo Dimi Nyutshwela

16 Dimi lambunyutela akambu aso, ne dia nyu nyatukutakanyema. 2 Vo wayunyutundja uma lu temwelo. Ee, etena kayuyala, lam'ayukana untu layunyudiaka ati: Dimi lambutshela Umyashungu ulimu. 3 Vo wayutsha akambu aso, ne dia vo haweyi Papa, hawumbeyi. 4 Keli dimi lambunyutela akambu aso, ne dia nyu mbaaho lam'ayuyala etena kawo, uku akamanyutela.

Dimi kunyutela akambu aso l'etatelu, ne dia dimi laki la nyu. 5 Keli kakiane, dimi lutatshu le One lakantumi. Ku nduku untu amumbula ati: Utsha lendi atayatshu? 6 Keli ne dia dimi lambunyutela akambu aso, mbambulula etema anyu la lunyangu. 7 Keli dimi lambunyutela mete nti: Oolo dimi nyutshwela. Naka dimi hatshu, ku Ukimanyidi hayi le nyu. Keli naka dime lambutsho, layunyutumelandi. 8 Lam'ayundaya, ndi ayutshumuya wa la kete dia akambu wa kolo, la dia akambu w'ololo, ndu dia dialelu: 9 dia akambu wa kolo, ne dia vo hawumbetawo; 10 dia akambu w'ololo, ne dia dimi layutsho le Papa, nyu hanyuyomena ntu; 11 dia dialelu, ne dia umbuledi a kete nye ambulumbuyama.

12 Dimi la akambu akina efula wa nyutela, keli nyu hanyeyi mbalungula kakiane. 13 Keli lam'ayuya Nyuma ka mete, ndi ayunyolombola lu akambu wa mete tshe. Ne dia ndi hayati, keli ndi ayuta paka akambu wayunduka. Ndi ayunyutela akambu wahatayi. 14 Ndi ayuntumbula, ne dia ndi ayosa akambu ami, ayunyutelawo. 15 Diango tshe dia Papa dieko diam. Dikambu diako mbanyutelami nti: Ndi ayosa akambu ami, ayunyutelawo.

16 Etenyi ka tshitshe, ku hanyuyomena ntu; etenyi ka tshitshe ntu, ku nyayomena. 17 Ambeki andi amotsshi wakambwana vati: Diui diakona diatutelandi so ati: Etenyi

ka tshitshe, hanyuyomena; la etenyi ka tshitshe ntu, ku nyayomena; la diui dikina ati: Ne dia dimi layutsho le Papa? 18 Ku vo wakambwana vati: Diui diakona diatandi so ati: Etenyi ka tshitshe? Hateyi kene katandi. 19 Jesu akeyi ati: Vo nangaka mumbulami, ku ndi akawambula ati: Nyu nyambumbwana dia diui diakamatshi nti: Etenyi ka tshitshe, hanyuyomena, la etenyi ka tshitshe ntu nyayomena? 20 Mete, mete, kanyutelami nti: Nyayulela, nyayunkumbula, keli wa la kete wayongenangena. Nyayuala la lunyangu, keli lunyangu lanyu layukadimo ongenongeno. 21 Lam'ata umuntu lono, ndi ndjalaka la lunyangu ne dia etena kandi kambukuka. Keli lam'ayunduta ona, ndi huho shoko yandi ntu, ne dia ongenongeno andi diai ambuto la kete. 22 Okone nyu la lunyangu kakiane, keli dimi layunyena ntu, ku etema anyu wayongenangena. Nduku untu ayunyohotola ongenongeno anyu. 23 Lushi lako, nyu hanyumumbula dikambu. Mete, mete, kanyutelami nti: Dikambu tshe diayunyolomba Papa lu lukumbu lami, ndi ayunyushadio. 24 La ntundu nyu konomba dikambu lu lukumbu lami. Nyolombe, nyayulungula, dia ongenongeno anyu aluli.

"Nyongenengene: Lambuleka wa la Kete Wulu"

25 Dimi lambunyutela akambu aso lu wela. Etena kayuyala lam'ayumuya hanyutela akambu lu wela ntu, keli dimi layunyutela akambu wa Papa hwe. 26 Lushi loso, nyu nyayolomba lu lukumbu lami. Dimi hanyutela nti: Dimi layunyolombela Papa; 27 ne dia Papa ndame nyulangaka, ne dia nyu nyambunanga. Nyu nyambetawo nyati: Dimi lambuya uma le Papa. 28 Dimi lakayi uma le Papa, lambuya la kete. Dimi layumo la kete, layukalula le Papa.

29 Ambeki andi wakati vati: Enda, kakiane we ambututela akambu hwe, we hawati lu wela. 30 Kakiane shu tambeya shati: We mbeyaka akambu tshe, hahumbi untu nkumbula dikambu. Uma lu dikambu so, mbambutetawo shati: We ambuya uma le Umyashungu. 31 Jesu akawambula ati: Nyu nyambetawo kakiane? 32 Enda, etena kayuyala, ee, kambuyalaka, lam'ayuwunyudianganya, untu laandi, untu laandi. Nyu nyayuntshika dime, keli aha dime, ne dia Papa eko la mi. 33 Dimi lambunyutela akambu aso, dia nyu ndjala la ki l'utema ami. La kete, nyu la asui, keli nyongenengene! Dimi lambuleka wa la kete wulu.

Elombelo k'Elakanelu

17 Lam'akati Jesu akambu aso, ndi akedia ashu utsha l'ulungu, akati ati: Papa, etena kambukuka. Utumbuli On'aye, dia Ona akutumbuli, 2 uku akayawusha wulu wa mbulela antu tshe, dia ndi mbisha tshe wakayawusha lumu la pundju. 3 Lumu la pundju lone, eli nkeya, weme Unyashungu wa mete, la Jesu Kristu, lakayatumi. 4 Dimi lakakutumbula la kete, lakashidiya ulimu wakayambisha wa ntsha. 5 Kakiane, Papa, untumbuli la ntundu kaye la lutumbu laki la mi kame la ye ntundu andja watatungama.

6 Dimi lakenya lutumbu laye le antu wakayambisha uma le wa la kete. Waye mbakiwo, we kakambishawo. Vo wakakitanya diui diaye. 7 Kakiane, vo mbeyaya vati: Diango tshe diakayambisha diambuya uma le ye, 8 ne dia dimi lakawasha aui wakayamvutela. Vo wakâlungula; wakeyi mete vati: Dimi lakayi uma le ye. Vo wambetawo vati: We kakantumi. 9 Dimi lambâlombela. Dimi halalombela wa la kete, keli wane wakayambisha, ne dia vo weko waye. 10 Tshe weli wami, weko waye, la wane tshe weli waye, weko wami; la dimi lambutumbwama le wo. 11 Dimi kema la la kete ntu, vo weko wa la kete, ku dimi luyayi le ye. Papa k'Ekila, ulami wane wakayambisha lu lukumbu laye, dia vo ndjala otoi uku wesu. 12 Lam'akimi la wo, dimi lakâlamaka lu lukumbu laye, lakayambisha. Dimi lakalamaka wane wakayambisha. Nduku otoi awo akashisho, tshikima ona eshishwelu, dia afundelu nsheidiyama. 13 Keli kakiane, dimi lambuya le ye. Lambuta akambu aso la kete, ne dia ongenongeno ami aluli l'etema awo vame. 14 Dimi lakawatela diui diaye. Wa la kete wakâhetsha, ne dia vo kema wa la kete, uku wemi kema la la kete. 15 Dimi halombe nti: Uwanya la kete, keli lambukolomba nti: Uwashimbeli uma lu kolo. 16 Vo kema wa la kete, uku wemi kema la la kete. 17 Uwakidia lu mete. Diui diaye dieko mete. 18 Uku akayantumi l'atei a wa la kete, okone mbakamâtumi l'atei a wa la kete. 19 Dimi lambuyakidia lu dikambu diawo, dia ndu vo wayakidia lu mete.

20 Dimi halombela wane atu, keli lambolombela ndu waku wayumbetawo lu diui diawo, 21 ne dia vo tshe wayali otoi. Papa, uku weye l'utema, ami, la dimi l'utema aye, ndu vo wayali l'etema asu. Okone wa la kete wetawo vati: We kakantumi. 22 Lutumbu lakayambisha, mbakamawasha, dia vo ndjala otoi uku

wesu otoi: 23 dimi l'etema awo, la we l'utema ami, dia vo tshe ndjala paka otoi, ne dia wa la kete weyi vati: We kakantumi, kakâlangi uku akayanangi. 24 Papa, dimi nangaka wane wakayambisha ndjala la mi lene ayumuyala, dia vo mena lutumbu lami lakayambisha, ne dia we akanangi la ntundu k'etatelu k'andja. 25 Papa k'uluwanyi, wa la kete kunkeya, keli dimi lakakeyi, la wane wakeyi vati: We kakantumi. 26 Dimi lakawaewuya lukumbu laye, layuwaewuya ntu, dia ngandji kambukaye ndjala l'etema awo, la dimi l'etema awo.

Judasi Ambufunga Jesu
(Mat. 26:47-56; Mak. 14:43-50;
Luk. 22:47-53)

18 Lam'akati Jesu aui aso, ndi akatshu la ambeki andi la wedi a djushi ya Kidirona, lene aki ekambo. Ndi la ambeki wakoto loko. 2 Ndu Judasi, lakûfungi, akeyaka dihuli so, ne dia Jesu akatshokaka leko tena efula la ambeki andi. 3 Lam'akalungula Judasi ului w'alimbi la alami uma le elombedi a waki la Afarise, ndi akatshu leko la atala, la ewa, la dihumo dia ta. 4 Jesu akeyi akambu tshe wayanga ndja le ndi, ku ndi akasukana, akawambula ati: Ayanganyu na? 5 Vo wakûkaluya diui vati: Jesu y'usi Nazareta. Jesu akawatela ati: Dim'one. Ndu Judasi, lakûfungi, akemadi la wo. 6 Lam'akandawatela ati: Dim'one, ku vo wakakalula ekongokongo, wakako la kete. 7 Ku ndi akawambula ntu ati: Ayanganyu na? Vo wakati vati: Jesu y'usi Nazareta. 8 Jesu akâkaluya diui ati: Dimi lakanyutedi nti: Dim'one. Naka dimi kayanganyu, wane watshu; 9 dia nsheidya diui diakandati ati: Dimi kunshisha nduku omotshi a wane wakayambisha. 10 Simona Petero aki la yombo, ku ndi akayisomola, akakote ukambi w'olombedi a wuki, akûhimbulu tui dia lupami. Lukumbu l'ukambi ako laki Malako. 11 Jesu akatela Petero ati: Osome yombo yaye lu dihusu. Dimi hano dikoho diakambisha Papa uka?

Wambunda Jesu
(Mat. 26:57-58; Mak. 14:53-54; Luk. 22:54)

12 Ului w'alimbi la olombodi awo, la alami w'asi Juda wakandi Jesu, wakûkeleka. 13 Vo wakatshu la ndi ntundu le Anasi, ne dia ndi aki ukilu a Kayifasi, laki olombedi a ladiku eleku keso. 14 Kayifasi kako kakasha asi Juda yimba ati: Ololo untu otoi mvwela antu.

JOANI

*Petero Ambanguna Jesu
Langunu la Ntundu
(Mat. 26:69-70; Mak. 14:66-68;
Luk. 22:55-57)*

15 Simona Petero ndu umbeki ukina wakayeli Jesu. Umbeki oso akeyamaka le olombedi a ladiku, akoto la Jesu lu lukumbu l'olombedi a ladiku, 16 keli Petero akemala la suku dia l'andja. Ku umbeki aki, lakeyamaka le olombedi a ladiku, akatumbi, akateketa la usekaseka a umuntu lakalamaka suku, ku ndi akotshiya Petero. 17 Ku usekaseka a umuntu lakalamaka suku akambula Petero ati: Ndu we keli umbeki omotshi w'untu one? Ndi akati ati: Kema. 18 Ekambi la elami wakemadi leko wahetsha dja y'akalanga, ne dia aki tshitshi. Vo wakukaka dja, ndu Petero aki la wo emadi uka dja.

*Olombedi a Ladiku Ambumbula Jesu
(Mat. 26:59-66; Mak. 14:55-64;
Luk. 22:66-71)*

19 Olombedi a ladiku akambula Jesu di'ambeki andi la wetshelu andi. 20 Jesu akukaluka diui ati: Dimi lakatela antu diui diamni lu seke. Dimi laketshaka antu nshi tshe lu temwelo, ndu lu etemwelo ka wuki lene atusanganaka asi Juda tshe. Dimi kumvuta nduku dikambu lu usheshe. 21 Dikambu kuna diamumbulaye na? Umbuli wane wakuki aui ami akambu wakamatelaka. Ulungi, vo mbeyaka akambu wakamataka. 22 Lam'akandati diui so, ulami omotshi lakemadi la le ndi, akakomola Jesu luwala; akati ati: Undi, wuhu oso mbambuyukaluya olombedi a ladiku diui? 23 Jesu akukaluya diui ati: Naka dikambu dia kolo mbutshimi, uditi. Keli naka dikambu di'ololo, ya ukundi ankomolaye na? 24 Ku Anasi akutumi ukelekami le Kayifasi, olombedi a ladiku.

*Petero Ambanguna Jesu
Etena ka Hendi la ka Satu
(Mat. 26:71-75; Mak. 14:69-72;
Luk. 22:58-62)*

25 Simona Petero akemadi uka dja. Ku vo wakawumbula vati: Ndu we keli umbeki andi omotshi? Ndi akanguna; akati ati: Kema. 26 Ukambi omotshi w'olombedi a ladiku, laki onangu la lakahimbu Petero tui, akawumbula ati: Dimi kunkena la ndi l'ekambo uka? 27 Ku Petero akanguna ntu. Kem'edja lekeka lakeki.

*Jesu la Ntundu ka Pilata
(Mat. 27:1-2, 11-14; Mak. 15:1-5;
Luk. 23:1-5)*

28 Vo wakamo la Jesu uma laka Kayifasi, wakatshu la ndi lu luudu l'elumbwelu. Aki la lokese. Vo vame komboto lu luudu l'elumbwelu, vati: Tutukutuyasanya dia nde dambu di'Elekanelu. 29 Ku Pilata akatumbi, akatshu utsha le wo; akawumbula ati: Dikambu diakona diasongwelanyu untu one? 30 Vo wakukaluya diui vati: Utunduyala untu one aha utshi a kolo, tshiki shu hatukimo l'anya aye. 31 Pilata akawatela ati: Nyuwose nyame, nyülbunya uku elembé anyu. Asi Juda wakawutela vati: Eko ekila dia shu ndjaka untu, 32 ne dia nshidiya diui diakati Jesu, dia menya wuhu a nyo kayunduvo.

33 Ku Pilata akoto lu luudu l'elumbwelu ntu, aketi Jesu; akawumbula ati: We keli Khum'ekanga k'asi Juda? 34 Jesu akukaluya diui ati: Weme kamumbula osoku, kana akina mbakakutela dikambu diamni? 35 Pilata akukaluya diui ati: Usi Juda kemi uka? Wudja aye hita la olombedi a waki mbakakukimo le mi. Kakayatshi na? 36 Jesu akukaluya diui ati: Diulelu diamni diaha dia la kete nye. Utunduyala diulelu diamni dia la kete nye mbedio, tshiki antu ami wutondwela ta, diaha dimi nkimbwama l'anya w'asi Juda. Keli kakiane, diulelu diamni diaha dia la kete nye. 37 Ku Pilata akawumbula ati: Okone we eko Khum'ekanga? Jesu akakaluya diui ati: Kam'ataye aso kedio, Khum'ekanga kemi. Dimi lakuto dia dikambu ne. Dia dikambu ne mbakamayi la kete, dia mvuta akambu wa mete. Kanga akambu wa mete tshe atukaka diui diamni. 38 Pilata akawumbula ati: Mete, eli na?

Lam'akandawumbula diui so, ndi akatumbi, akatshu le asi Juda ntu, akawatela ati: Dimi hambutanyi nduku la unungu. 39 Keli nyu nyeko la ethselu ka dimi nyutshungwela untu omotshi lu dambu di'Elekanelu. Okone nyu nangaka dimi nyutshungwela Khum'ekanga k'asi Juda? 40 Vo wakahangoango ntu vati: Aha untu one, paka Baranabasi! Keli Baranabasi aki opotodi.

"Enda, Untu One"
*(Mat. 27:15-31; Mak. 15:6-20;
Luk. 23:13-25)*

19 Pilata akose Jesu, akokomola eshingo. 2 Alimbi wakele dembo dia kusu di'atende, wakülimbedio l'ote, wakolotsha ukutu wa tilili. 3 Vo wakayi la le ndi, wakawemula vati; Moyo Khum'ekanga k'asi Juda! wakökoma mbala. 4 Pilata akatumbi

ntu, akawatela ati: Nyulungi, dimi lambuya la ndi le nyu, ne dia nyu mbeya nyati: Dimi hambutanyi la unungu. 5 Ku Jesu akatumbi olotshi dembo dia kusu di'atende la ukutu wa tiliili. Pilata akawatela ati: Nyendi untu one! 6 Lam'akawenyi elombedi a waki la alami, vo wakahangohango vati: Údiaki l'utamba a mpeketanya! Údiaki l'utamba a mpeketanya. Pilata akawatela ati: Nyuwose nyame, nyúdiaki, ne dia dimi hambutanyi la unungu. 7 Asi Juda wakúkaluya diui vati: Shu la olembe, ku uma lu olembe aki, dieli la ndi dia mvo; ne dia ndi akayaete Ona a Unyashungu. 8 Lam'akuki Pilata diui so, ndi akuki worma efula. 9 Ndi akoto lu luudu l'elumbwelu, akambula Jesu ati: Uma lendi uyeye na? Keli Jesu kumbukaluya diui. 10 Ku Pilata akawumbula ati: We hamvutela diui? We heyi wati: Dimi la wulu wa nkutshungula, ndu la wulu wa nkudika la utamba a mpeketanya? 11 Jesu akúkaluya diui ati: Utunduyala vo kunkusha wulu uma l'ulungu, tshiki we kema la wo wa ntshelami dikambu. Okone one lakankimwi le ye, keli la dikambu diuleki kolo.

12 Dia diui diako, Pilata akayangi mbütshungula. Keli asi Juda wakahangohango vati: Naka we ambutshungula untu one, keti we kema ongenyi wa Kayisa. Untu tshe layaete khum'ekanga, ambonyola Kayisa. 13 Lam'akuki Pilata aui aso, ndi akatumbi la Jesu, akadjase lu kiti k'elumbwelu lu dihuli diakawetaka vati: Mbalasa ka Ave, keli l'oteketa w'asi Heberu ati: Ngabata. 14 Elongoswelo ka dambu di'Elekanelu kakakuki. Unya aki l'atei w'ote. Ndi akatela asi Juda ati: Nyendi khum'ekanga kanyu! 15 Ku vo wakahangohango vati: Uwunya! Uwunya! Údiaki l'utamba a mpeketanya! Pilata akawambula ati: Dimi layudiaka Khum'ekanga kanyu l'utamba a mpeketanya? Elombedi a waki wakakaluya diui vati: Shu kema la khum'ekanga, paka Kayisa. 16 Ku ndi akakimwelandi, dia vo mbûdiaka l'utamba a mpeketanya.

Wambuhane Jesu l'Utamba a Mpeketanya
(Mat. 27:32-44; Mak. 15:21-32;
Luk. 23:26-43)

17 Vo wakose Jesu. Ndi akatumbi ayembe utamba andi a mpeketanya utsha lu dihuli dietawo vati: Dihuli dia Lombo, l'oteketa w'asi Heberu ati: Ngolongota. 18 Vo wakúhane l'utamba a mpeketanya leko, kame la akina ahendi: omotshi lene, omotshi lene, ku Jesu l'atei. 19 Pilata akafundi efundelu, akakimami l'utamba a mpeketanya. Loko

kakafundami ati: “**JESU Y'USI NAZARETA, KHUM'EKANGA K'ASI JUDA.**” 20 Asi Juda efula wakali efundelu kako, ne dia dihuli diakawahane Jesu l'utamba a mpeketanya diaki lasuki la ngelu. Aui aso wakafundama l'oteketa w'asi Heberu, la w'asi Romo ndu w'asi Ngirika. 21 Ku elombedi a waki w'asi Juda wakatela Pilata vati: Tufundaki wati: Khum'ekanga k'asi Juda, keli ufundi wati: Ndi kakataka ati: Dimi Khum'ekanga k'asi Juda. 22 Pilata akákaluya diui ati: Uku akamafundji, mbakamafundji.

“Enda, On’aye Uku”...“Enda, Nyo Uku”

23 Lam'akawahane Jesu l'utamba a mpeketanya, alimbi wakose ahondo, wakákahanya lu elui enei, dimbi wandi, dimbi wandi. Ndu ukutu, tawaki la etelelo. Vo wakelama tshe uma ladiku pulu ndu l'esi. 24 Ku vo wakatanelo vati: Tatuwatulaki, tuwuki uwali, teyi layuyala kangawo. Ne dia diui dia afundelu diashidiyami ati: Wakakahana ahondo ami, Wakuki ukutu ami uwali.

25 Akambu aso mbakatshi alimbi. Keli nyangu, la onangu nyangu la umuntu, Mariya wadi a Kelopa, la Mariya w'usi Mangadala, wakemala lasuki la utamba a mpeketanya wa Jesu. 26 Lam'akenyi Jesu nyangu la umbeki wakandalangaka wemadi lasuki, ndi akatela nyangu ati: *Umuntu, enda On’aye!* 27 Ku ndi akatela umbeki ati: *Enda nyo!* Umaka etena keso, umbeki aki akawose lakandi.

“Ambushila”
(Mat. 27:45-56; Mak. 15:33-41;
Luk. 23:44-49)

28 L'okongo diku, Jesu akeyi ati: Kakiane akambu tshe wambushila (dia diui di'afundelu nshidiyama), ndi akati ati: *Dimi la pusa.* 29 Donga diaki leko too la wanu w'ukayi. Vo wakose dimbu, dioloyami tshe la wanu aki w'ukayi lu tshamba y'usasi, wakúmamidio l'unyo. 30 Lam'akaete Jesu wanu w'ukayi, ndi akati ati: *Ambushila.* Ku ndi akakole ote, akakitsihiya.

“Nduku Weka Andi Wayoko”

31 Lushi loso, laki lushi l'Elongoswelo. Okone asi Juda wakalombe Pilata dia mbaokola pelohelo, la mbanya, ne dia edu tawutshikalaki l'etamba a mpeketanya lushi l'ekila (ne dia lushi l'ekila laki lushi la wuki). 32 Ku alimbi wakayi, wakokola ekulu wa one la ntndu la wa ukina lakawahane la ndi lu utamba a mpeketanya. 33 Keli lam'akawayi le Jesu, vo wakenyi vati: Ndi ambushila mvo. Okone vo kumbôkola

ekulu. 34 Dimbi dimotshi akuhiki dikonga lu luhandju, kema edja dikila la ashi wakatumbi. 35 One lakenyi dikambu so, akaditi; diui diandi dieko mete. Ndi mbeyaka ati: Mete katami dia ndu nyu mbetawo. 36 Akambu aso wakayala ne dia diui di'afundelu nshidiyama ati: Nduku weka andi wayoko. 37 Ntu afundelu kekina ambuta ati: Vo wayenda one lakawahiki dikongka.

Wambukhunde Jesu
(Mat. 27:57-61; Mak. 15:42-47;
Luk. 23:50-56)

38 L'okongo w'akambu aso, Josefu ya la Arimatiya, laki umbeki a Jesu lu usheshe ne dia woma w'asi Juda, akalombe Pilata dia minya udu a Jesu. Ku Pilata aketawo. Ku ndi akayi, akanya udu. 39 Ndu Nikodemo, lakayi le Jesu l'utshu ntundu, akayi la diango di'upumu dia nshimba udu mponda, diaki la wutshu wa livere lukama. 40 Ku vo wakose udu a Jesu, wakawombe ahondo wa linene, kame la diango di'upumu, uku etshelu k'asi Juda ka nkundu antu. 41 Lu dihili diakawadiaki Jesu lu utamba a mpeketanya, aki ekambo kernotshi. Lu ekambo kako, kaki diumbu di'uyuyu diahatakhundama nduku untu. 42 Lushi l'Elongoswelo l'asi Juda, ne dia diumbu diaki lasuki, ku vo waketamia Jesu loko.

Wambuya Dia Ndjenda Diumbu
(Mat. 28:1-10; Mak. 16:1-8; Luk. 24:1-12)

20 Lushi la ntundu la lubingu, Mariya w'usi Mangadala akayi la diumbu la kesekeste, eki hyutshihutshi, yanyi yatawale. Ndi akatani dive diambunyama uma la diumbu. 2 Ku ndi akawalo le Simona Petero la le umbeki ukina wakalangaka Jesu; akawatela ati: Vo wambunya Khumadiiondo uma lu diumbu, hateyi lene akawawetamisha. 3 Ku Petero akatumbi ndi la umbeki ukina, wakatshu utsha la diumbu. 4 Vo ahendi wakalawo kame. Umbeki ukina akaleki Petero luwangu, akakumi la diumbu ntundu. 5 Ndi akemala, akalingela loko, akenyi ahondo wa linene walemi, keli ndi komboto loko. 6 Ku Simona Petero akayi ayuyeli l'okongo, akoto lu diumbu. Ndi akenyi ahondo wa linene walemi, 7 ndu kitambala kaki l'ote a Jesu, kaki kumbalena la ahondo wa linene, kaki wombo lu dihili dikina. 8 Ku ndu umbeki ukina lakakumi ntundu la diumbu, akoto l'okongo, akendi, aketawo. 9 Ne dia laso ku vo watalimbitela diui di'afundelu ati: Dieli la ndi dia mbulo uma lu nyoi. 10 Ku ambeki wakakalula la wakawo.

"Umuntu, Kalelaye Na?"
(Mak. 16:9-11)

11 Keli Mariya akemala l'andja a diumbu alela. Lam'akandalelaka osoku, ndi akalingela lu diumbu. 12 Ndi akenyi andjelo ahendi wudjashi, wolotshi ahondo a wema, omotshi l'ote, ukina l'ekulu, lene aketami udu a Jesu. 13 Vo wakawumbula vati: Umuntu, kalelaye na? Ndi akawatela ati: Ne dia vo wambunya Khumemi, haleyi lene akawawetamisha. 14 Lam'akandati osoku, ndi akasikiso, akenyi Jesu emadi, keli ndi kumbeya ati: Jesu. 15 Jesu akawumbula ati: Umuntu, kalelaye na? Ayangaye na? Umuntu akukani ati: Ulami w'ekambo. Ndi akawutela ati: Uwandji, naka we akawunyisha, umvuteli lene akayatuwetamia, keli ntuwose. 16 Jesu akaweti ati: Mariya! Mariya akasikiso; akawetwo l'oteketa w'asi Heberu ati: Raboni (nkadimula ati: Umbetscha). 17 Jesu akawutela ati: Tumunandaki, ne dia dimi latambela le Papa. Keli utshu le analingu, utuwateli wati: Dimi layumbela le Papa, Shenyu, le Unyashungu ami ndu Unyashungu anyu. 18 Mariya w'usi Mangadala akayutela ambeki ati: Dimi lakenyi Khumadiiondo. Ndi akamvutedi akambu aso.

"Ki Kayali la Nyu"
(Mat. 28:16-20; Mak. 16:14-18; Luk. 24:
36-49)

19 La dikolo dia lushi loso, laki lushi la ntundu la lubingu, lam'aki ambeki lu luudu, la kuki yudihami ne dia woma w'asi Juda, Jesu akayi, akemala l'atei awo. Ndi akawatela ati: Ki kayali la nyu! 20 Lam'akandati diui so, ndi akawaenya anya la luhandju. Ku ambeki wakangenangena lam'akawenyi Khumadiiondo. 21 Ku Jesu akawatela ati: Ki kayali la nyu! Uku akantumi Papa, osoku mbanyutumami. 22 Lam'akandati diui so, ndi akâfufi lumu, akawatela ati: Nyulunguli Nyuma k'Ekila. 23 Antu tshe wayunyudimanya kolo, wayudimanyama kolo yawo. Antu tshe wayunyutshikela kolo yawo, wayutshikala lu kolo yako.

Tomasi Ambudja Tamu

24 Keli Tomasi, omotshi a l'ambeki dikumi la ahendi, lakawetaka vati: Diasa, taki laawo lam'akayi Jesu. 25 Ku ambeki akina wakawutela vati: Shu takenyi Khumadiiondo. Keli ndi akawatela ati: Naka dimi hamenyi fu y'esumadi l'anya andi, hambidji luhita lu fu y'esumadi, la lunya lu luhandju landi, ku haletawo.

"Khumemi, Unyashungu Ami"

26 L'okongo a nshi enanei, ambeki andi waki lu luudu ntu, ndu Tomasi aki la wo. Lam'akadihamma kuki, Jesu akayi, akemala l'atei awo. Ndi akati ati: Ki kayali la nyu! 27 Ku ndi akatela Tomasi ati: Udji lu hita laye lane, endaanya ami. Usimbili lunya, uludji lu luhandju lami. Tuyalaki la tamu, keli etawo. 28 Tomasi akukaluya diui ati: Khumemi, la Unyashungu ami! 29 Jesu akawutela ati: We ambomena, mbambuyetawo. Wane wahatenyi, ku wambetawo, weko la otshoko.

Dikambu Diafundu Ufundji Aui Aso

30 Jesu akatshi tulimbitelu tukina efula lu ashu w'ambeki, tahafundami lu mukanda one. 31 Keli akambu aso wambufundama dia nyu mbetawo nyati: Jesu eko Kristu, On'a Unyashungu; la dia nyu ndjala la lumu lu lukumbu landi lam'ayunyetawo.

***Jesu Ambene le Ambeki
l'Uduwa wa Tiberiya***

21 L'okongo w'akambu aso, Jesu akayaenya le ambeki andi ntu l'Uduwa a Tiberiya; okone mbakandayena. 2 Simona Petero, la Tomasi, lakawetaka vati: Diasa, la Natanye, usi Kana ka la Ngilili, la ana wa Zebede, la ambeki andi akina ahendi waki kame. 3 Simona Petero akawutela ati: Dimi lambutsho la ntunda nsi. Vo wakawutela vati: Tutshu la ye. Vo wakatshu, wakoto lu watu. L'utshu ako, vo kumunda engo.

4 Keli lam'akayangi unya mputo, Jesu akemadi l'umamu w'ashi. Keli ambeki kumbeya vati: Jesu. 5 Ku Jesu akawambula ati: An'ami, nyu la engo ka nde? Vo wakukaluya diui vati: Kema. 6 Ndi akawutela ati: Nyudji tei lu lunya la pami la watu, ku nyayena nsi. Ku vo wakadjie tei, tshinyi tshitshe vo kumbeya nkikutula ne dia nsi efula. 7 Ku umbeki wakalangaka Jesu akatela Petero ati: Khumadiiondo one! Lam'aku Simona Petero ati: Khumadiiondo oso, ndi akalote ukutu andi, ne dia ndi akukulula, akayatambya l'ashi. 8 Keli ambeki akina wakayi lu yatatu, ne dia okenge taki etali, aki uku aboko akumi atanu, wayakutula tei kuludi la nsi too.

9 Lama'akawakumi l'okenge, vo wakenyi akalanga wa dja waheta la nsi yuhanemi la diku diawo, la ukama a ma. 10 Jesu akawutela ati: Nyela nsi kina yambunyunda kakiane. 11 Ku Simona Petero akatshu, akukutula tei l'okenge, kuludi la nsi ya waki lukama la akumi atanu la shatu. Kuyanga nsi yaki efula osoku, tei kumbate. 12 Jesu akawutela ati: Nyuyi, nyuli.

Nduku umbeki aki la dihunga dia mbumbula ati: We na? Vo wakeyi vati: Khumadiiondo. 13 Jesu akayi, akose ukama a ma, akawashadio, kame la nsi. 14 Etena ka satu keso kakenama Jesu le ambeki lam'akandulo uma lu nyoi.

"We Mbukakami Ngandji?"

15 Lam'akawali, Jesu akambula Simona Petero ati: Simona, on'a Joani, we ndeka ane mbukakami ngandji? Ndi akawutela ati: Elu, Khumadiiondo. We mbeyaka wati: Dimi nkukaka ngandji. Ndi akawutela ati: Uleshaki an'ami w'ekoko. 16 Ndi akawumbula etena ka hendi ati: Simona, on'a Joani, we mbukakami ngandji? Ndi akawutela ati: Elu, Khumadiiondo. We mbeyaka wati: Dimi nkukaka ngandji. Ndi akawutela ati: Ulamaki ekoko ami. 17 Ndi akawumbula etena ka satu ati: Simona, on'a Joani, we mbukakami ngandji? Petero akanyangi ne dia ndi akawumbula etena ka satu ati: We mbukakami ngandji? Ndi akawutela ati: Khumadiiondo, we mbeyaka akambu tshe. We mbeyaka wati: Dimi nkukaka ngandji. Jesu akawutela ati: Uleshaki ekoko ami. 18 Mete, mete, kakutelami nti: Lam'akiye olongo a pami, we akayalotshaka uya, akakendakenda lene akayalangaka; keli lam'ayuyuala usumbi, we ayusimbulaanya aye, ku ukina ayukolotsha uya, ayukotola lene ahayalangi. 19 (Diui so mbakati Jesu, ne dia nimbitshiya wuhu wa nyoi kayundutumbula Unyashungu.) Lam'akandati osoku, ndi akawutela ati: Undjeli.

20 Petero akasikiso, akenyi umbeki wakalangaka Jesu ayuyeli. Ndi kakawekama ekongokongo lu tulu kandi lam'akawalekaka ma dia dikolo. Ndi kakawumbula ati: Khumadiiondo, ayukufunga na? 21 Lam'akawenyi Petero, ndi akambula Jesu ati: Khumadiiondo, kayutsha untu one na? 22 Jesu akawutela ati: Lam'ayumulanga nti: Ndi atshikali la lumu edja ndu lam'ayumukalula, dikambu diaye mbedio uka? Undjeli. 23 Diui diako diakadiangana l'atei w'anyawo ati: Umbeki aho huvo. Keli Jesu kumbutela ati: We huvo. Ndi akati ati: Naka dimi layulanga nti: Ndi atshikali la lumu edja ndu lam'ayumukalula, dikambu diaye mbedio?

Umbeki One Akafundi Akambu Aso Mete

24 Umbeki one lakati akambu aso, ndi kakafundi. Shu mbeyaka shati: Diui diandi dieko mete.

25 Jesu akatshu ndu akambu akina efula. Utunduyala dikambu la dikambu diafundami, dimi lambukuna nti: Kete yame tshu tutuyeya nkuka abuku tshe wutufundama.